

# **Strategjia Kombëtare për Parandalimin e Pastrimit të Parave dhe Financimit të Terrorizmit 2024-2030**

---

Tiranë, Mars 2024

## **Përmbajtja**

<b>SHKURTIMET</b> .....	<b>3</b>
<b>PËRMBLEDHJE EKZEKUTIVE</b> .....	<b>6</b>
<b>I. PROCESI I HARTIMIT TË STRATEGJISË KOMBËTARE PËR PARANDALIMIN E PP/LFT</b> .....	<b>6</b>
<b>II. VËSHTRIM I PËRGJITHSHËM I REGJIMIT TË PPP/FT NË SHQIPËRI</b> .....	<b>7</b>
2.1 Kuadri ligjor për pastrimin e parave .....	7
2.2 Kuadri ligjor për financimin e terrorizmit.....	8
2.3 Ligje me karakter administrativ për parandalimin e PP/FT .....	10
2.4 Funksionimi i sistemit të parandalimit dhe luftës ndaj PP/FT .....	11
<b>III. FAKTORËT KRYESORË KONTRIBUES NË FORMULIMIN E STRATEGJISË KOMBËTARE PËR LPP/LFT</b> .....	<b>15</b>
3.1 Mangësitë e identifikuar nga organet monitoruese/vlerësuese.....	16
3.2 Politikat dhe planet përkatëse të nivelit të lartë.....	19
3.3 Rezultatet e Vlerësimit Kombëtar të Riskut.....	23
3.4 Konteksti ndërkombëtar .....	31
3.5 Mjedisi aktual dhe trendet e sektorit financiar .....	34
3.6 Konteksti i Sigurisë Kombëtare .....	35
3.7 Pastrimi i parave dhe kërcënimet nga financimi i terrorizmit.....	37
<b>IV. FUSHAT KRYESORE STRATEGJIKE</b> ,.....	<b>38</b>
<b>V. QËLLIMI, OBJEKTIVAT SPECIFIK DHE TREGUESIT E NIVELIT STRATEGJIK</b> .....	<b>40</b>
5.1 Vizioni dhe misioni i Strategjisë: .....	40
5.2 Prioriteti nr.1: Përmirësimi i politikbërjes dhe koordinimit.....	41
5.3 Prioriteti nr.2: Rritja e mëtejshme e efektivitetit operacional në parandalim .....	42
5.4 Prioriteti nr.3: Përmirësimi i efikasitetit operacional të organeve ligjzbatuese dhe agjencive të tjera në luftën kundër PP/FT.....	43
5.5 Prioriteti nr.4: Përdorimi dhe shfrytëzimi i inovacioneve teknologjike duke zvogëluar rreziqet. ....	45
<b>VI. MONITORIMI DHE VLERËSIMI</b> .....	<b>46</b>
<b>ANEKS 1: TABELA E PLANIT TË VEPRIMIT</b> .....	<b>48</b>

## SHKURTIMET

AAPSK	- Agjencia e Administrimit të Pasurive të Sekuestruara dhe të Konfiskuara
AIF	- Agjencia e Inteligjencës Financiare
AKSHE	- Autoriteti i Kontrollit Shtetëror të Eksporteve
AMF	- Autoriteti i Mbikëqyrjes Financiare
AMLF	- Autoriteti i Mbikëqyrjes së Lojërave të Fatit
ASHK	- Agjencia Shtetërore e Kadastrës
ASHM	- Armët e Shkatërrimit në Masë
BE	- Bashkimi Evropian
BKH	- Byroja Kombëtare e Hetimit
BMP	- Bordi i Mbikëqyrjes Publike
BSH	- Banka e Shqipërisë
CVE	- Qendra e Koordinimit Kundër Ekstremizmit të Dhunshëm
DASH	- Departamenti Amerikan i Shtetit
DNFBP	- Bizneset dhe Profesionet e Caktuara Jofinanciare
DPD	- Drejtoria e Përgjithshme e Doganave
DPSH	- Drejtoria e Përgjithshme e Policisë së Shtetit
RPDKV	- Republika Popullore Demokratike e Koresë Veriut
DPT	- Drejtoria e Përgjithshme e Tatimeve
DHKA	- Dhoma Kombëtare e Avokatisë
DHKN	- Dhoma Kombëtare e Noterëve
FATF	- Grupi i Posaçëm i Veprimit Financiar
FINTECH	- Teknologjia Financiare
GTN	- Gupi Teknik Ndërinstitucional
ICITAP	- Programi Ndërkombëtar i Asistencës për Trajnimin e Hetimeve Kriminale
ICRG	- Grupi i Shqyrtimit të Bashkëpunimit Ndërkombëtar
IFJB	- Institucion Financiar Jo-Bankë

ILDKPKI	- Inspektorati i Lartë i Deklarimit dhe Kontrollit të Pasurive dhe Konfliktëve të Interesave
Indeksi TI	- Indeksi Ndërkombëtar i Transparencës
INSTAT	- Instituti i Statistikave
KBLKPP	- Komiteti për Bashkërendimin e Luftës Kundër Pastrimit të Parave
KSKB	- Këshilli i Sigurimit i Kombeve të Bashkuara
LHT	- Luftëtarët e Huaj Terroristë
MD	- Ministria e Drejtësisë
MF	- Ministria e Financave
MFE	- Ministria e Financës dhe Ekonomisë
mld	- miliard
mln	- milion
Moneyval	- Komiteti i Ekspertëve për Vlerësimin e Luftës Kundër Pastrimit të Parave
NAREA	- Shoqata Shqiptare e Ndërmjetësve të Pasurive të Paluajtshme
NATO	- Organizata e Traktatit të Atlantikut të Veriut
NRA	- Vlerësimi Kombëtar i Riskut
OJF	- Organizatë Jo-Fitimprurëse
OKB	- Organizata e Kombeve të Bashkuara
OSBE	- Organizatën për Siguri dhe Bashkëpunim në Evropë
PAMECA	- Misioni i Asistencës Policore të Komunitetit Evropian në Shqipëri
PBB	- Prodhimi i Brendshëm Bruto
PEP	- Person i Ekspozuar Politikisht
PF	- Person Fizik
PJ	- Person Juridik
PKK	- Pika e Kalimit Kufitar
PP/FT	- Pastrimi i Parave dhe Financimi i Terrorizmit
PP	- Prokuroria e Përgjithshme
PPP	- Parandalimi i Pastrimit të Parave
QKB	- Qendra Kombëtare e Biznesit
RAD	- Raporti i Aktivitetit të Dyshimtë

RSH	- Republika e Shqipërisë
SFJB	- Subjekt Financiar Jo-Bankë
SPAK	- Prokuroria e Posaçme Kundër Korrupsionit dhe Krimit të Organizuar dhe Njësia e
STR	Posaçme Hetimore-Bvrosia Kombëtare e Hetimit - Raporte të Transaksioneve të Dyshimta
Sh.a	- Shoqëri anonime
SHBA	- Shtetet e Bashkuara të Amerikës
SHISH	- Shërbimi Informativ i Shtetit
SHKK	- Shoqëri Kursim-Krediti
Sh.p.k	- Shoqëri me përgjegjësi të kufizuar
TEDA	- Zona të Zhvillimit Ekonomik dhe Teknologjik
TE-SAT	- Raporti i Situatës dhe Trendit të Terrorizmit
TFS	- Sanksione për Terrorizmin Financiar
TVSH	- Tatimi mbi Vlerën e Shtuar
VASP	- Ofruesi i Shërbimit të Aseteve Virtuale
VKM	- Vendim i Këshillit të Ministrave
ZKV	- Zyrë e Këmbimit Valutor

## PËRMBLEDHJE EKZEKUTIVE

### I. PROCESI I HARTIMIT TË STRATEGJISË KOMBËTARE PËR PARANDALIMIN E PP/LFT

Strategjia kombëtare për parandalimin dhe luftën ndaj PP/FT (në vijim Strategjia) është produkt i një procesi koordinimi dhe bashkëpunimi ndërinstytucional, bazuar mbi praktikën më të mirë të fushës, nevojat e evidentuara nga ana e institucioneve dhe aktorëve të përfshirë, si dhe rekomandimet e organizmave ndërkombëtare. Procesi i hartimit ka kaluar në disa faza:

Në dhjetor 2023 KBLKPP vendosi për hartimin e Strategjisë brenda 6-mujorit të parë 2024. Kjo detyrë ju caktua Grupit teknik të punës me përfaqësues nga të gjithë institucionet anëtare në KBLKPP. Nëpërmjet asistencës nga GIZ u kontraktua ekspertiza e nevojshme për draftin e parë të dokumentit, i cili erdhi si proces i zhvillimit të disa takimeve me aktorët kryesorë (publik dhe privat) të sistemit.

Në funksion të hartimit të kësaj strategjie, u realizua një raund takimesh me institucionet dhe shoqata.

Përveç takimeve, procesi i hartimit ka përfshirë faza konsultimesh me institucionet përkatëse. Gjithashtu strategjia, përpara konkludimit të saj është diskutuar në XXX takime të Grupit teknik ndërinstytucional të punës.

Strategjia përpara konkludimit të saj u rishikuar edhe nga një ekspert i kontraktuar nga Këshilli i Evropës.

Në hartimin e Strategjisë, ndër të tjera, janë marrë në konsideratë edhe dy elementë të tjerë të rëndësishëm siç janë: harmonizimi me dokumente të tjerë strategjikë<sup>1</sup> dhe i është kushtuar një vëmendje e veçantë rolit të sektorit privat, si një faktor shumë i rëndësishëm në hartimin dhe zbatimin e kësaj strategjie.

---

<sup>1</sup> - Strategjia Kombëtare për Zhvillim dhe Integrim Evropian 2020-2030- VKM ne.88, dr. 22.03.2023 SKZHIE 2022-2030

- Strategjia e Sigurisë Kombëtare 2023-2028-. SSK LIGJ Nr. 14/2024

- Strategjia Ndërsektoriale të Menaxhimit të Integruar të Kufirit 2021-2027

- Strategjia Ndërsektoriale të Luftës Kundër **Terrorizmit** 2023-2025

- Strategjia Kundër Krimit të Organizuar dhe Krimeve të Rënda 2021-2025 dhe Plani i veprimit

- Strategjia Ndërsektoriale për parandalimin e ekstremizmit të dhunshëm dhe luftën kundër terrorizmit 2023–2025 dhe plani i veprimit

- Programi i Reformave Ekonomike (ERP) 2024-2026

- Dokumenti i politikave prioritare 2024-2026

Strategjia si një dokument gjithëpërfshirës harmonizohet me gjetjet dhe konkluzionet e vlerësimit kombëtar të rrezikut të PP/FT, por këto gjetje dhe konkluzione vendosen në një kontekst më të shtirë në kohë dhe në tema makro duke synuar identifikimin e prioriteteve dhe objektivave strategjike afatmesëm dhe afatgjatë për periudhën 2024 – 2030.

## II. VËSHTRIM I PËRGJITHSHËM I REGJIMIT TË PPP/FT NË SHQIPËRI

### 2.1 Kuadri ligjor për pastrimin e parave

Vepra e pastrimit të parave është e parashikuar në Kodin Penal që në vitin 1995. Për vetë rrezikshmërinë dhe veçoritë që ka kjo vepër penale, është përfshirë në Kreun VIII të Kodit Penal “Krime kundër autoritetit të shtetit”, Seksionin III “Vepra penale kundër rendit dhe sigurisë publike” (së bashku, me vepra si: ‘Prodhimi e trafikimi i lëndëve narkotike apo armëve’, ‘Organizimi dhe drejtimi i organizatave kriminale’, etj.), pasi në fakt me kategorizimin në këtë seksion synohet që të mbrohet një e mirë e përgjithshme dhe shumë e rëndësishme, që është autoriteti i shtetit, mosrespektimi i të cilit sjell pasoja veçanërisht të dëmshme për tërësinë e qytetarëve të vendit.

Vepra e pastrimit të parave në vendin tonë e ka zanafillën me miratimin e Kodit Penal në vitin 1995 (Ligj. Nr.7895 dt. 27.01.1995) neni 287 “Tjetërsimi i pasurisë”.

Për vetë rrezikshmërinë dhe veçoritë që ka kjo vepër penale, është përfshirë në Kreun III të Kodit të Kodit Penal të titulluar “Krime kundër autoritetit të shtetit”, Seksionin III “Vepra penale kundër rendit dhe sigurisë publike” (së bashku me vepra si prodhimi e trafikimi lëndëve narkotike apo armëve, organizimi dhe drejtimi i organizatave kriminale) etj., pasi në fakt me kategorizimin në këtë seksion synohet që të mbrohet një e mirë e përgjithshme dhe shumë e rëndësishme që është autoriteti i shtetit, mosrespektimi i të cilit sjell pasoja veçanërisht të dëmshme për tërësinë e qytetareve të vendit.

Në vitet në vijim, vepra e pastrimit të parave është ndryshuar disa herë (2001, 2003, 2004, 2007, 2012 dhe 2013), kryesisht si rrjedhojë e përafrimit me konventat e ratifikuara, por edhe nevojat e brendshme.

#### **Neni 287 aktualisht në fuqi është si vijon:**

Pastrimi i produkteve të veprës penale ose veprimtarisë kriminale, nëpërmjet:

- a) këmbimit ose transferimit të pasurisë, me qëllim fshehjen ose mbulimin e origjinës së paligjshme të saj, duke ditur se kjo pasuri është produkt i veprës penale ose i veprimtarisë kriminale;

- b) fshehjes ose mbulimit të natyrës së vërtetë, burimit, vendndodhjes, disponimit, zhvendosjes, pronësisë ose të drejtave në lidhje me pasurinë, duke ditur që kjo pasuri është produkt i veprës penale ose i veprimtarisë kriminale;
- c) fitimit të pronësisë, posedimit ose përdorimit të pasurisë, duke e ditur në çastin e marrjes në dorëzim të saj, që kjo pasuri është produkt i veprës penale ose i veprimtarisë kriminale;
- d) kryerjes së veprimeve financiare ose transaksioneve të copëzuara për shmangien nga raportimi, sipas legjislacionit për parandalimin e pastrimit të parave;
- e) investimit në veprimtari ekonomike ose financiare të parave a sendeve, duke ditur se janë produkte të veprës penale ose veprimtarisë kriminale;
- f) këshillimit, ndihmës, nxitjes ose thirrjes publike për kryerjen e secilës prej veprave të përcaktuara më sipër;

dënohet me burgim nga pesë gjer në dhjetë vjet.

Kur kjo vepër kryhet gjatë ushtrimit të një veprimtarie profesionale, në bashkëpunim ose më shumë se një herë, dënohet me burgim nga shtatë gjer në pesëmbëdhjetë vjet.

E njëjta vepër, kur ka sjellë pasoja të rënda, dënohet jo më pak se pesëmbëdhjetë vjet me burgim.

Dispozitat e këtij neni zbatohen edhe kur:

- a) vepra penale, produktet e së cilës pastrohen, është kryer nga një person që nuk mund të merret si i pandehur ose që nuk mund të dënohet;
- b) ndjekja penale për veprën, produktet e së cilës pastrohen, është parashkruar ose amnistuar;
- c) personi që kryen pastrimin e produkteve është i njëjtë me personin që ka kryer veprën, nga e cila kanë rrjedhur produktet;
- d) për veprën penale, nga e cila kanë ardhur produktet, nuk është filluar asnjëherë çështja penale apo nuk është dhënë një dënim me vendim penal të formës së prerë;
- e) vepra penale, produktet e së cilës pastrohen, është kryer nga një person, pavarësisht shtetësisë së tij, jashtë territorit të Republikës së Shqipërisë dhe është njëkohësisht e dënueshme, si në shtetin e huaj, ashtu edhe në Republikën e Shqipërisë.

Dijenia dhe qëllimi, sipas paragrafit të parë të këtij neni, nxirren nga rrethana fakti objektive.

Neni 287, detajon të gjitha rastet që mund të konsiderohen pastrim parash dhe shprehimisht dënon edhe vetëpastrimin. Nga vlerësimet e organizmave ndërkombëtare, kjo vepër penale është në përputhje me standardet dhe konventat e fushës.

## **2.2 Kuadri ligjor për financimin e terrorizmit**

Në lidhje me financimin e terrorizmit, dënimi i tij fillimisht është parashikuar në vitin 2003, duke shtuar në Kod Penal nenin 230/a (dhe një sërë nenesh të tjera -230/b, 230/c, 230/ç, 230/d-që kane lidhje me ndihmesën që në forma të ndryshme mund ti jepej terrorizmit).

Në vijim neni 230/a u ndryshua sërish, duke përthithur në të edhe nenin 230/d (Grumbullimi i fondeve për financimin e Terrorizmit) dhe duke bërë disa përmirësime të mëtejshme për t'ju



përafuar konventave të fushës. Aktualisht neni 230/a (duke përfshirë edhe shfuqizimin e dënimit me gjobë, si dënim kryesor, krahas dënimit me burgim) ka këtë përmbajtje:

#### Neni 230/a

Dhënia ose grumbullimi i fondeve, me çdo mjet, në mënyrë të drejtpërdrejtë ose të tërthortë, me qëllimin që ato të përdoren ose duke ditur se ato do të përdoren, plotësisht ose pjesërisht:

- a) për të kryer vepra me qëllime terroriste;
- b) nga një organizatë terroriste;
- c) nga një terrorist i vetëm; dënohet jo më pak se pesëmbëdhjetë vjet burgim ose me burgim të përjetshëm.

Dispozitat e këtij neni zbatohen:

- a) për të gjitha fondet, ku përfshihen pasuri të çdo lloji, të trupëzuara ose të patrupëzuara, të luajtshme ose të paluajtshme, pavarësisht nga mënyra e fitimit të tyre, dhe dokumente ligjore ose instrumente të çdo lloji, edhe në formë elektronike ose digjitale, që tregojnë të drejta ose interesa mbi pasuri të tilla, përfshirë kreditë bankare, çeqet e udhëtarëve, çeqet bankare, urdhërpagesat, aksionet, letrat me vlerë, bonot, çeqet e garantuara bankare, letrat e kreditit, si dhe çdo instrument tjetër financiar, të ngjashëm me to;
- b) pavarësisht nëse personi që kryen një nga veprat e parashikuara në paragrafin e parë të këtij neni, ndodhet në të njëjtin shtet a në një shtet të ndryshëm nga ai, në të cilin ndodhet organizata terroriste a terroristi i vetëm ose nga shteti në të cilin është kryer a do të kryhet vepra me qëllime terroriste;
- c) në rastin e parashikuar nga paragrafi i parë i këtij neni, pavarësisht nëse fondet janë përdorur në fakt për të kryer veprën ose veprat, për të cilat ishin dhënë ose grumbulluar, apo nëse mund të vendoset një lidhje mes fondeve dhe një apo më shumë veprave konkrete me qëllime terroriste.

Dijenja dhe qëllimi, sipas paragrafit të parë të këtij neni, nxirren nga rrethana fakti objektive.

Gjithashtu Kodi Penal i Shqipërisë parashikon një sërë veprash të tjera të lidhura me terrorizmin apo financimin e terrorizmit si: ‘Fshehja e fondeve dhe e pasurive të tjera, që financojnë terrorizmin’ neni 230/b, ‘Rekrutimi i personave për kryerjen e veprave me qëllime terroriste ose të financimit të terrorizmit’ neni 231, ‘Nxitja, thirrja publike dhe propaganda për kryerjen e veprave me qëllime terroriste’ neni 232/a , ‘Pjesëmarrja në veprime luftarake në një shtet të huaj’ neni 265/a, ‘Organizimi për pjesëmarrje në veprime luftarake në një shtet të huaj’ neni 265/b, parashikime të cilat kanë pasur një efekt frenues.

### 2.3 Konventat Ndërkombëtare të Fushës

Republika e Shqipërisë në vijimësi ka aderuar gjithashtu në konventat ndërkombëtare të cilat kanë të bëjnë me parandalimin dhe luftën kundër pastrimit të parave, terrorizmit dhe financimit të tij. Konventat kryesore që veçohen janë:

- Konventa Evropiane “Për pastrimin, depistimin, kapjen dhe konfiskimin e produkteve të krimit” ratifikuar me Ligj nr. 8646, datë 20.7.2000 (e njohur si Konventa e Strasburgut);
- “Konventa e Kombeve të Bashkuara kundër krimit të organizuar ndërkombëtar” (dhe dy protokolleve shtesë të saj) ratifikuar me Ligj nr 8920, datë 11.7.2002 (e njohur si Konventa e Palermos);
- Konventën e Kombeve të Bashkuara kundër trafikut të paligjshëm të drogave narkotike dhe të lëndëve psikotrope ratifikuar me Ligj nr. 8722, datë 26.12.2000;
- Konventa e Këshillit të Evropës “Për pastrimin, kërkimin, kapjen dhe konfiskimin e produkteve të krimit dhe për financimin e terrorizmit” ratifikuar me Ligj nr. 9646, datë 27.11.2006 (e njohur si Konventa e Varshavës);
- Konventa e Këshillit të Evropës “Për parandalimin e terrorizmit” ratifikuar me Ligj nr. 9641, datë 20.11.2006;

Ratifikimi i konventave të mësipërme e vendos vendin tonë përpara detyrimeve shtesë, pasi këto instrumente janë tanimë pjesë e legjislacionit tonë të brendshëm.

#### **2.4 Ligje me karakter administrativ për parandalimin e PP/FT**

Për sa i përket ligjeve me karakter administrativ që shërbejnë për parandalimin e pastrimit të parave dhe financimit të terrorizmit janë, si vijon:

- Ligji nr. 9917/2008 “*Për parandalimin e pastrimit të parave dhe financimit të terrorizmit*”, i ndryshuar i cili ka për qëllim parandalimin e pastrimit të parave dhe produkteve që burojnë nga veprat penale si dhe parandalimin e financimit të terrorizmit;
- Ligji nr. 157/2013 “*Për masat kundër financimit të terrorizmit*”, i ndryshuar i cili parashikon të gjithë mekanizmat ligjore për parandalimin dhe goditjen e veprimtarive të terroristëve, atyre që mbështesin dhe financojnë terrorizmin apo të atyre për të cilët ka dyshime të bazuara që kanë kryer, po kryejnë ose kanë qëllim të kryejnë veprimtari të tilla, duke ndërmarrë veprimet e bllokimit dhe sekuestrimit të fondeve e pasurive, në zbatim të rezolutave përkatëse të Këshillit të Sigurimit të Kombeve të Bashkuara, akteve të organizatave të tjera ndërkombëtare apo marrëveshjeve ndërkombëtare, ku Republika e Shqipërisë është palë.

Në këtë kuadër, në vendin tonë zbatohen plotësisht rezolutat e KS të OKB, si: Rezoluta 1267 (1999), 1373 (2001), rezolutat pasuese të tyre dhe ato të miratuara në vitet në vijim, si: 1452 (2002), 1989 (2011), 2178 (2014), 2242 (2015), etj., të cilat kanë për qëllim përditësimin e listave të personave të shpallur me vendime të Këshillit të Ministrave, sekuestrimin e fondeve, ndalimin e hyrjes në vend për personat e shpallur, etj.

Masat e përkohshme që parashikohen të merren me ligjin nr. 157/2013 të sipërpërmendur nuk varen nga ato që mund të merren në kuadrin e procedimeve penale apo pasurore. Nga ana tjetër,


këto masa të përkohshme, nuk pengojnë zbatim e dispozitave procedurale penale apo atyre pasurore për sekuestrimin dhe konfiskimin e fondeve dhe të pasurive të tjera, sipas procedurave përkatëse.

Veçanti e këtij ligji është edhe parashikimi në thelb i dy procedurave të shpalljes si financues terrorizmi: e para, që ka të bëjë me aplikimin e detyrimeve që rrjedhin nga rezolutat e Këshillit të Sigurimit të Kombeve të Bashkuara dhe e dyta, është një procedurë e brendshme shpallje që mund të marrë indicie nga organet përkatëse të ngarkuara për parandalimin dhe luftën kundër financimit të terrorizmit dhe që bëhet efektive pas vendimit përkatës të Këshillit të Ministrave.

Ligjet e sipërpërmendura janë ndryshuar disa herë, duke marrë për bazë vlerësimin e MONEYVAL, Direktivat e BE por edhe nevojat e vendit dhe aktualisht vlerësohet se janë në përputhje me standardet ndërkombëtare.

## **2.5 Funkcionimi i sistemit të parandalimit dhe luftës ndaj PP/FT**

Sistemi i parandalimit dhe luftës ndaj PP/FT në Shqipëri operon bazuar në tre shtylla të pavarura, secila me rëndësi thelbësore, por në ndërveprim aktiv reciprok me njëra tjetrën. Këto tre shtylla punojnë së bashku si në aspektin parandalues por edhe për të mbështetur edhe luftën ndaj krimit të organizuar, terrorizmit dhe krimet e tjera si evazioni fiskal, korrupsioni, krimi kibernetik, trafiku i drogës dhe mashtrimi. Regjimi balancon objektivat duke synuar ruajtjen e integritetit të sistemit financiar të Shqipërisë dhe duke garantuar sigurinë e shtetasve shqiptarë, duke respektuar të drejtat dhe liritë individuale, përfshirë ato të privatësisë.





1) **Parandalimi dhe zbulimi** ka si synim mbikëqyrjen dhe zbatimin e përputhshmërisë me PPP/FT dhe mbledhjen, analizën dhe shpërndarjen e inteligjencës financiare dhe informacioneve të tjera.

AIF ushtron funksionet si autoritet përgjegjës dhe si njësi e specializuar financiare për parandalimin dhe luftën kundër pastrimit të parave dhe financimit të terrorizmit<sup>2</sup>. Gjithashtu, kjo agjenci funksionon si qendër kombëtare e ngarkuar me mbledhjen, analizimin dhe shpërndarjen tek agjencitë e zbatimit të ligjit të të dhënave për veprimtaritë e mundshme të pastrimit të parave dhe financimit të terrorizmit.

AIF shkëmben informacion me prokuroritë e juridiksionit të përgjithshëm, Prokurorinë e Posaçme, Policinë e Shtetit, Byronë Kombëtare të Hetimit, Shërbimin Informativ të Shtetit, autoritetet e tjera kompetente të zbatimit të ligjit apo të inteligjencës dhe me çdo agjenci të huaj homologe, në varësi të detyrimeve të ngjashme të konfidencialitetit.

Kur ka arsye të bazuara në fakte dhe rrethana konkrete për PP/FT, AIF urdhëron monitorimin e llogarive apo veprimeve bankare për një periudhë të caktuar, apo bllokimin ose ngrirjen e përkohshme të transaksionit ose të veprimit financiar, për një periudhë jo më shumë se 72 orë.

Përveç kësaj, AIF kryesisht, mbi bazë të një vendimi të Këshillit të Ministrave, apo për rastet e kërkuara nga Grupi i Posaçëm i Veprimit Financiar, organizma të tjerë ndërkombëtarë, nga të cilët lindin detyrime për Republikën e Shqipërisë, nxjerr listën e vendeve për kufizimin dhe/ose kontrollin e transaksioneve apo marrëdhënieve të biznesit të subjekteve, proporcionalisht me

<sup>2</sup> Neni perkates ne ligjin e pp/ft

reziqet e evidentuara, vendime këto të detyrueshme për zbatim nga subjektet dhe autoritetet shtetërore që kanë detyrime sipas këtij ligjit për parandalimin e pastrimit të parave dhe financimit të terrorizmit.

Përveçse më sipër, AIF ushtron edhe funksione mbikëqyrëse, edhe pse jo si objekt kryesor veprimtarie, në lidhje e përputhshmërinë e zbatimit të detyrimeve ligjore për subjektet që i nënshtrohen ligjit të PPP/FT.

- Roli mbikëqyrës kryesor ju besohet një sërë institucionesh si p.sh: Banka e Shqipërisë, Autoriteti i Mbikëqyrjes Financiare, Ministria e Drejtësisë, Dhoma Kombëtare e Avokatisë, Agjencia e Mbikëqyrjes së Lojërave të Fatit, Bordi i Mbikëqyrjes Publike etj.<sup>3</sup>. Funksionet kryesore të autoriteteve mbikëqyrëse, për veprimtaritë nën juridiksionin e tyre, janë si më poshtë vijon kontrollojnë zbatimin e programeve të luftës kundër PP/FT nga subjektet dhe sigurohen se këto programe janë të përshtatshme;
- informojnë dhe bashkëpunojnë me autoritetin përgjegjës, për çështjet e mospërputhshmërisë, rezultatet e inspektimeve të tyre, masat përmirësuese që do të merren dhe masat administrative;
- ndërmarrin masat e nevojshme për të parandaluar që një person i papërshtatshëm të zotërojë, të kontrollojë ose të marrë pjesë, në mënyrë të drejtpërdrejtë ose të tërthortë, në drejtimin, administrimin ose veprimtarinë e një subjekti;
- bashkëpunojnë dhe të ofrojnë asistencë të specializuar, sipas veprimtarisë së tyre, në fushën e PP/FT, në përputhje me kërkesat e autoritetit përgjegjës;
- bashkëpunojnë për përgatitjen dhe shpërndarjen e programeve të trajnimit në fushën e PPP/FT;
- mbajnë statistika për veprimet e ndërmarra, si dhe për sanksionet e vendosura.

Në plotësim të hallkave të mësipërme, sistemi përbëhet edhe nga një numër i konsiderueshëm subjektesh (kryesisht private, por jo vetëm) si p.sh: bankat, zyrat e këmbimit valutor, institucionet financiare jo banka, fondet e pensionit, noterët, avokatët, firmat e ndërtimit, lojërat e fatit, kazinotë, audituesit ligjorë, kontabilistët e miratuar, agjentët e pasurive të paluajtshme që etj., të cilët kanë një sërë detyrimesh ligjore si raportimi i rasteve të dyshimta te autoriteti përgjegjës dhe ushtrimi i vigjilencës së duhur, të thjeshtuar apo të zgjeruar ndaj klientëve të tyre.

Paralelisht me këto masa subjektet kanë detyrim për të ndërmarre masa parandaluese si p.sh.: hartimi dhe zbatimi efektiv i rregulloreve/udhëzimeve të brendshme të cilat, në përpjesëtim me natyrën dhe përmasat e subjektit, parashikojnë marrjen e masave të përshtatshme për të kuptuar rrezikun e PP dhe të FT dhe zbutur ato. Gjithashtu ata duhet të:

- caktojnë një person përgjegjës për PP/FT në nivele administrimi/drejtimi në zyrën qendrore dhe në çdo zyrë përfaqësimi, filial, degë ose agjenci, te të cilat të gjithë punonjësit raportojnë çdo fakt që mund të përbëjë dyshim për PP/FT;

---

<sup>3</sup> Neni përkatës në ligjin e pp/ft

- krijojnë një sistem të centralizuar përgjegjës për grumbullimin dhe analizimin e të dhënave;
- trajnojnë punonjësit për PP/FT përmes organizimit periodik të programeve të kualifikimit;
- kësejnë vlerësime rrisht të brendshme, duke përfshirë rrishtun e biznesit përkatës dhe atë të klientëve;
- etj.<sup>4</sup>,

Detyrime të posaçme për raportim kanë edhe organet doganore, tatimore si ASHK dhe çdo autoritet që regjistron, licencon dhe mbikëqyr veprimtarinë e OJF.

2) **Hetimi** ka si objekt identifikimin, hetimin, ndjekjen penale dënimin e krimeve të PP/FT.

Në plotësim të sistemit parandalues të përshkruar më sipër, shtylla tjetër po aq e rëndësishme është edhe ajo që mund të quhet sistemi luftues ndaj PP/FT që përbëhet nga organet e zbatimit të ligjit siç janë Policia e Shtetit, Prokuroritë e Juridiksionit të Përgjithshëm dhe SPAK. Këto organe kanë si objekt të veprimtarisë së tyre hetimin dhe dërgimin përpara përgjegjësisë të subjekteve të dyshuara për PP/FT. Të dyja hallkat (ajo parandaluese me atë luftuese) veprojnë në mënyrë të pavarur, por në të njëjtën kohë shkëmbejnë dhe ndajnë informacione, duke patur bashkëveprim aktiv me njëra-tjetrën.

3) **Politika dhe koordinimi** ka si synim vlerësimin e rreziqeve të PP/FT, zhvillimin e politikave vendase dhe ndërkombëtare, dhe koordinimin ndërinstitucional.

Krahas autoriteteve dhe subjekteve të përmendura më sipër, të cilët kanë një rol thelbësor dhe operacional në parandalimin dhe luftën ndaj PP/FT, arkitektura e sistemit plotësohet me Komitetin e Bashkërendimit të Luftës Kundër Pastrimit të Parave (KBLPP), i cili është organi i nivelit më të lartë përgjegjës për përcaktimin e drejtimeve të politikës së përgjithshme shtetërore në fushën e parandalimit dhe luftës kundër PP/FT.

Komiteti drejtohet nga Kryeministri dhe në përbërje ka ministrat përgjegjës për:

- financat;
- punët e jashtme;
- çështjet e mbrojtjes;
- rendin dhe sigurinë publike;
- çështjet e drejtësisë.

Pjesë e Komitetit janë edhe Prokurori i Përgjithshëm, Drejtuesi i Prokurorisë së Posaçme, Guvernatori i Bankës së Shqipërisë, Drejtori i Përgjithshëm Ekzekutiv i Autoritetit të Mbikëqyrjes Financiare, Drejtori i Shërbimit Informativ të Shtetit, Inspektori i Përgjithshëm i Inspektoratit të

---

<sup>4</sup> Referenca e nenit në ligjin e pp/ft

Lartë të Deklarimit dhe Kontrollit të Pasurive dhe Konfliktit të Interesave, Drejtori i Byrosë Kombëtare të Hetimit dhe Drejtori i Përgjithshëm i Policisë së Shtetit.

Komiteti mund të krijojë grupe pune teknike dhe/ose operationale për të ndihmuar në kryerjen e funksioneve që ka, si dhe për studimin e tipologjive e të teknikave të PP/FT. Në mbledhjen e KBLKPP në datën 27.12.2023, krahas miratimit të Vlerësimit Kombëtar të Riskut si dhe planit të veprimit përkatës, Grupit Teknik Ndërinstitucional i Punës është riformatuar, duke përfshirë në nëngrupe pune edhe përfaqësues nga subjekte private, sipas fushave përkatëse.

GTNP, i cili mbledhet periodikisht, angazhohet edhe në pregaditjen e strategjive si dhe në funksion të vlerësimeve nga organizmat ndërkombëtare të fushës, siç është Komiteti Moneyval.

Grafiku/figura: Arkitektura e sistemit PPP/FT

### **III. FAKTORËT KRYESORË KONTRIBUES NË FORMULIMIN E STRATEGJISË KOMBËTARE PËR LPP/LFT**

Shqipëria është e angazhuar në nivel politik, qeverisës dhe institucional në parandalimin, zbulimin dhe ndjekjen penale të pastrimit të parave dhe aktivitetet e lidhura me financimit të terrorizmit. Pastrimi i parave vlerësohet si një kërcënim për sigurinë e shoqërisë, integritetin e sistemit financiar, stabilitetin e ekonomisë dhe rritjen e qëndrueshme të saj.

Shqipëria ka krijuar ka një kuadër ligjor të përshtatshëm për këtë fushë, në përputhje me Rekomandimet e FATF, si dhe ka strukturat institucionale të duhura që përfshijnë një gamë të gjerë autoritetesh kompetente për të parandaluar, mbikëqyrur, zbuluar, hetuar PP/FT dhe konfiskimin e pasurive.

Rezultatet e arritura kanë qenë produkt i një pune të vazhdueshme dhe rrugëtimi të shtrirë në kohë, duke përmirësuar në mënyrë graduale si aspektet e përputhshmërisë teknike të bazës ligjore me rekomandimet dhe standartet ndërkombëtare të fushës, ashtu edhe efektivitetin e zbatimit të tyre.

Në vijim të vlerësimit të fundit nga Moneyval (2018), Shqipëria u fut në të ashtuquajturën listë gri (2020), nga ku doli në vitin 2023 si pasojë e zbatimit dhe përmirësimit të një sere masash e rekomandimesh të përcaktuara nga organet monitoruese ndërkombëtare. Pavarësisht kësaj, ndonëse janë bërë shume hapa pozitive si në kuadrin ligjor, ashtu edhe në zbatimin efektiv të tij, mbeten ende disa faktorë që kërkojnë adresim në vitet në vijim. Vlen të evidentohet se edhe standartet referuese ndërkombëtare (të FATF apo të BE) presojnë ndyshime të vazhdueshme, për rrjedhojë ndjekja e tyre, përafrimi dhe monitorimi i zbatimit mbetëm synim i vazhdueshëm për vendin tonë.

Formulimi i kësaj strategjie vjen edhe si rezultat i nevojës për adresimin e këtyre rekomandimeve/standardeve, gjetjeve të vlerësimit kombëtar të riskut dhe planit të veprimit për adresimin e risqeve të PP/FT, vizionit të vendit për arritjen e objektivave Shqipëria 2030, adresimit të sfidave të sigurisë kombëtare dhe rolit të Shqipërisë në rajon dhe në rrafshin ndërkombëtar.

Kjo strategji synon do të ndihmojë veç të tjerash edhe procesin e vlerësimit të radhës nga Moneyval (2025), duke ndërgjegjësuar më mirë e koordinuar me tej aktorët e përfshirë në parandalimin dhe luftën ndaj PP/FT, me synim pasqyrimin sa më të plotë të punës dhe masave të marra nga vendi ynë.

Përveçse sa më sipër, faktorët kryesorë thelbësorë mbi të cilët bazohet nevoja e hartimit të strategjisë mund të përmbliidhen si më poshtë:

- Roli në rritje i Shqipërisë në komunitetin ndërkombëtar dhe marrëdhëniet me vendet përkatëse dikton nevojën për zbatimin efektiv të rekomandimeve të FATF por edhe ato të BE në fushën PPP/FT;
- Integrimi i vëndit në tregjet ndërkombëtar të kapitalit, globalizimi i sistemeve tregtare dhe financiare, zhvillimet teknologjike;
- Lëvizja e lirë e njerëzve, e mallrave dhe e shërbimeve krijon edhe hapësira për aktivitete kriminale;
- Zhvillimet gjeopolitike dhe efektet që ato kanë për vendin tonë.

Këta faktor përveç kushteve zhvillimore dhe progresit për vëndin, shoqërohen dhe me rreziqe dhe mundësi për krime financiare, pastrim parash dhe financim të aktiviteteve të lidhura me terrorizmin dhe si rrjedhim është e domosdoshme që përveç ndërgjegjësimit të ketë edhe një plan veprimi me objektiva, detyra dhe masa konkrete të matshme për çdo aktor të përfshirë në parandalimin dhe luftën ndaj PP/FT.

### **3.1 Mangësitë e identifikuara nga organet monitoruese/vlerësuese**

Në tetor 2017 nisi procesi i vlerësimit nga Moneyval, i cili u finalizua me miratimin e Raportit të ndërsjellte vlerësimit (MER) në korrik 2018. Vlerësimi i Moneyval përqendrohej në raportimet e shteteve në lidhje me përputhshmërinë teknike të kuadrit ligjor të vendit me 40 Rekomandimet e FATF dhe efektivitetin e masave të marra në kuadër të sistemit parandalues të PP/FT. Vlerësimi bazohej mbi të dhënat për periudhën 2011-2017.

Si rezultat i vlerësimit u konkludua se nga 40 Rekomandime të FATF Shqipëria kishte:

- 1 Rekomandim të pa përputhur (NC);
- 10 Rekomandime të përputhur pjesërisht (PC);
- 27 Rekomandime të përputhur gjerësisht (LC);
- 2 Rekomandime të përputhur (C).



Përsa i përket vlerësimit të efektivitetit, nga 11 Rezultate imediate (IO):

- 2 IO ishin me efektivitet të ulët (LE);
- 7 IO ishin me efektivitet të moderuar (ME);
- 2 IO ishin me efektivitet të substancial (SE).

(Tabele me rezultatet fillestare të vlerësimit)

Në vijim të këtij vlerësimi, vendi u vendos në monitorim të përforcuar nga Moneyval, si dhe në vitin 2020 u vendos nga FATF në listën e vendeve në monitorim/“lista gri”.

Në këtë kuadër, Shqipëria ndërmori menjëherë një angazhim të nivelit të lartë politik për të bashkëpunuar me FATF dhe MONEYVAL për forcuar efektivitetin e sistemit parandalues të PP/FT nëpërmjet dakordësimit të një plani veprimi të përbërë nga 19 pika veprimi, me afat zbatimi brenda një periudhe 3 vjeçare.

Për ndjekjen dhe zbatimin e planit të veprimit u ngrit grupi ndërinstitucional i punës me Vendimin e Komitetit të Bashkërendimit të Luftës Kundër Pastrimit të Parave, nr. 1 datë 19.02.2020 *“Për ngritjen e grupit ndërinstitucional të punës për ndjekjen dhe përmbushjen e rekomandimeve të grupit të posaçëm të veprimit financiar”*. Ky grup pune drejtohej nga Zëvendëskryeministri, me përbërjen e të gjitha institucioneve përgjegjëse për zbatimin e planit të veprimit. AIF kishte rolin e sekretarit teknik për asistimin e grupit të punës.

Në tërësinë e tij plani i veprimit i dakordësuar prej Shkurt 2020 nuk pati ndryshime në përmbajtjen e tij, përveç zgjatjes së afatit të përmbushjes së planit të veprimit me 6 (gjashtë) muaj, që u ndikua edhe nga vështirësitë që solli pandemia globale COVID-19.

Raportimi mbi zbatimin e planit të veprimit realizohej mbi baza 4 mujore. Për gjithë procesin Shqipëria dërgoi 10 (dhjetë) raporte progresi pranë ICRG/FATF, ku më i fundit ishte ai i dërguar në datë 21 Korrik 2023. Ky raportim i fundit ishte një përmbledhje e punës 3 vjeçare të bërë nga të gjitha institucionet përgjegjëse në lidhje me zbatimin e planit të veprimit.

Në plenaren e Korrikut 2023 FATF miratoi përmbushjen e planit të veprimit nga Shqipëria duke evidentuar ndërmarrjen e një sërë nismash ligjore dhe reformash të cilat ndikuan ndjeshëm në rritjen e efektivitetit të sistemit parandalues të PP/FT. Këto masa çuan në daljen nga “lista gri” e FATF.

Aktualisht përputhshmëria teknike – pra e kuadrit ligjor lidhur me 40 rekomandimet e FATF, sipas vlerësimit të Moneyval, paraqitet si më poshtë:

- 6 Rekomandime të përputhura (C);
- 31 Rekomandime “gjerësisht të përputhura” (LC);
- 2 rekomandime “pjesërisht të përputhura” (PC);
- 1 rekomandim “i pa zbatueshme” (N/A);

- Asnjë rekomandim “i pa-përputhur” (NC).

Lidhur me dy rekomandimet që janë ende “pjesërisht të përputhura” (PC):

- Rekomandimi 7 “Masat shtrënguese ndërkombëtare për financimin e armëve të shkatërrimit në masë”: Ministria për Evropën dhe Punët e Jashtme dhe Ministria e Financave dhe Ekonomisë kanë hartuar dhe bashkë propozuar projektligjin “Për disa shtesa dhe ndryshime në ligjin 72/2019 “Për masat shtrënguese ndërkombëtare në RSH”, miratuar në seancën plenare të datës 14 Dhjetor 2023. Vlerësohet se vendi i ka përmbushur kriteret për rritje të këtij rekomandimi, mirëpo aplikimi nuk është i mundur për shkak se në vitin 2025 pritet të fillojë raundi i ri i vlerësimit të Shqipërisë nga Moneyval.
- Rekomandimi 15 “Teknologjitë e reja - ofruesit e mjeteve virtuale”: Në lidhje me këtë rekomandim synohet një përmbushje sa më e shpejtë dhe ka filluar puna në koordinim të plotë me institucionet përgjegjëse, si dhe me mbështetjen përmes ekspertizës të ofruar në kuadër të “Projektit kundër krimit ekonomik në Shqipëri” (AEC-AL), program i përbashkët i Këshillit të Evropës dhe Bashkimit Evropian. Vlerësohet se për R.15 mbeten ende të nevojshme zhvillime, për të arritur përmbushjen e rekomandimit.

Për sa i përket efektivitetit është vlerësuar se Shqipëria ka bërë progres në adresimin dhe përmirësimin e efektivitetit në dy IO që rezultuan me efektivitet të ulët.

Në Qershor 2023 Shqipëria siguroi ftesën për realizimin e vizitës në vend (on-site), procedurë që kryesisht i paraprin daljes së vendeve nga “lista gri”. Në datat 28 – 29 Gusht 2023 u zhvillua vizita në vend (on site) e grupit të ekspertëve vlerësues të planit të veprimit me ICRG/FATF.

Më 27 tetor 2023 u vendos dalja e Shqipërisë nga “lista gri” e pastrimit të parave ku u vlerësuan reformat e ndërmarra nga Shqipëria në adresim të mangësive të identifikuara.

Në deklaratën publike të FATF për daljen nga lista, përveç evidentimit të qartë të progresi të arritur dhe përgëzimit të Shqipërisë, evidentohet edhe se “FATF mirëpret angazhimin e Shqipërisë për të respektuar parimet e FATF në rast se Shqipëria prezanton një program aministie fiskale në të ardhmen.”, si dhe kërkon që Shqipëria “të vazhdojë të punojë me MONEYVAL për të mbështetur përmirësimet e saj në sistemin e saj PPP/FT”.

Në raportin e vlerësimit të Grupit të Përbashkët (Joint Group – JG) të ICRG/FATF, janë propozuar disa rekomandime, pavarësisht se nuk janë teknikisht të detyrueshme, por që duhet të mbahen në vëmendje nga Shqipëria në përmirësimin e mëtejshëm të sistemit parandalues të PP/FT dhe armëve të shkatërrimit në masë, si më poshtë vijon:

- Nëse Shqipëria do të hartojë në të ardhmen një program mbi amnistinë fiskale, JG inkurajon Shqipërinë të punojë me partnerët ndërkombëtarë për të siguruar që çdo program i tillë të jetë në përputhje me parimet dhe praktikën më të mira të FATF-së për programet e amnistisë fiskale (VTC programme).
- Inkurajohet Shqipëria të arrijë progres të mëtejshëm në ndjekjen e më shumë hetimeve penale dhe ngritjen e akuzave për veprën penale të pastrimit të produkteve të veprës penale

(pastrimin e parave) në lidhje me rreziqet e larta të identifikuar për pastrim parash si korrupsioni, krimi i organizuar dhe trafikimi i narkotikëve, me fokus të veçantë rastet kur vepra penale mëmë të jetë kryer në juridiksion të huaj.

- Inkurajohet Shqipëria të arrijë progres të mëtejshëm nëpërmjet një koordinimi më të gjerë ndërinstitucional për të vlerësuar kërcënimet e pastrimit të parave dhe financimit të terrorizmit dhe për të zhvilluar politika dhe strategji për të adresuar këto kërcënime. SPAK duhet të përfshihet plotësisht në këto përpjekje.
- Kërkohet nga Shqipëria që të ngrejë dhe të zbatojë një sistem të menaxhimit të rasteve me qëllim zëvendësimin e sistemit aktual të përdorur nga prokurorët për të menaxhuar dhe ndjekur ecurinë e rasteve.
- Shqipëria duhet të investojë në burime, njerëzore dhe teknologjike, në luftën kundër kërcënimeve të reja në fushën e pastrimit të parave (p.sh., krimi kibernetik, asetet virtuale, etj.).

Rekomandimet e mësipërme janë pranuar nga organet shqiptare dhe janë tanimë pjesë e planeve të veprimit apo punës, sipas fushave përkatëse të përgjegjësisë.

Siç është evidente nga këto rekomandime, fusha me potencial më të lartë shqetësues, përveç asaj për aministi fiskale, është ajo që lidhet me ndjekjen penale. Në të njëjtin drejtim shkojnë edhe rekomandimet e BE në kuadër të progres raporteve, apo edhe mekanizmave të tjerë siç janë “Road map” dhe “Growth Agenda”.

### **3.2 Politikat dhe planet përkatëse të nivelit të lartë**

Shqipëria mbetet e angazhuar në adresimin e sfidave dhe rekomandimeve që rrjedhin si pasojë e detyrimeve ndërkombëtare që lidhen me parandalimin dhe luftën ndaj PP/FT. Gjithashtu, në koordinim dhe harmonizim edhe me planet dhe strategjitë e tjera sektoriale të sigurisë kombëtare, luftës ndaj krimit të organizuar, korrupsionit, terrorizmit, ekstremizmit të dhunshëm, informalitetit etj., janë adresuar dhe do vijohet të adresohen një sërë mangësish, duke arritur rezultate të prekshme dhe konkrete.

Në zbatim të SKZHIE 2022-2030 dhe Strategjive të tjera e planeve të veprimit që ndërthuren me këtë Strategji, është miratuar Planit Kombëtar për Integrimin Evropian (PKIE) 2024–2026, si dhe Dokumenti i Politikave Prioritare 2025-2027.

Disa nga aktet me rëndësi në PKIE 2024-2026 janë si më poshtë:

- projektligji “Për krijimin e Zyrës së Rikuperimit të Aseteve”
- projektligji “Për koncesionet dhe partneritetin publik privat”
- projektligji “Për sigurinë kibernetike”
- projektligji “Për identifikimin elektronik dhe shërbimet e besuara”

- projektligji “Për disa shtesa dhe ndryshime në ligjin nr. 60/2016 “Për sinjalizimin dhe mbrojtjen e sinjalizuesve”
- projektligji “Për disa shtesa dhe ndryshime në ligjin nr. 10193, datë 3.12.2009 “Për marrëdhëniet juridiksionale me autoritetet e huaja në çështjet penale”
- projektligji “Për disa shtesa dhe ndryshime në ligjin nr. 46/2018 “Për transferimin ndërkombëtar të mallrave ushtarake dhe mallrave dhe teknologjive me përdorim të dyfishtë”.

Në dokumentin e politikave prioritare për vitet 2025-2027 ritheksohet se Qeveria është e vendosur të kryejë përpjekje të qëndrueshme në lidhje me prioritetet kyçe që kanë të bëjnë me reformën gjyqësore, politikën kundër korrupsionit, luftën kundër krimit të organizuar, mbrojtjen e të drejtave të njeriut dhe reformën në administratën publike si prioritete në kuadër të negociatave të grup kapitujve themelore dhe atyre të aderimit në përgjithësi. Në përparësitë afatshkurtra dhe afatmesme të Qeverisë ndër të tjera janë të përfshira:

- Lufta kundër korrupsionit
- Digjitalizimi

Siç u përmend më sipër, adresimi i mangësive të evidentuara, solli si pasojë daljen nga lista gri. Pavarësisht kësaj, procesi i adresimit të problematikave dhe mangësive do vijojë të ketë vëmendje të posaçme nga Qeveria si dhe organet e pavarura (hetimore, mbikëqyrës etj), duke synuar përputhshmërinë maksimale ligjore dhe rritje të mëtejshme të efektivitetit me rekomandimet dhe detyrimet e tjera ndërkombëtare të Shqipërisë.

Disa nga nismat/masat e adresuara të lidhura me parandalimin e PP/FT, hetimin e tyre apo edhe në fusha të lidhura me këto veprimtari, gjatë viteve të fundit janë si më poshtë:

#### **Nisma të lidhura me efektivitetin e hetimeve:**

- Progres pozitiv i përgjithshëm në zbatimin e reformës në drejtësi, proces i cili besohet se ka lidhje të drejtpërdrejtë edhe me progresin në fushën e hetimeve, sekuestrimeve dhe konfiskimeve në vend;
- Krijimi i regjistrit për administrimin dhe inventarizimin e pasurive të sekuestruara e të konfiskuara, për hetimet e kryera në kuadër të proceseve penale apo atyre pasurore;
- Krijimi dhe funksionimi i një sistem të ri elektronik për letër porosite pranë Ministrisë së Drejtësisë, për të menaxhuar dhe prioritetizuar rastet hyrëse dhe dalëse, përfshirë dhe kërkesat në pritje;
- Krijimi dhe funksionimi i sistemit “Presto” pranë Prokurorisë së Përgjithshme, i cili mundëson mbledhjen e të dhënave statistikore të detajuara, përfshirë gjurmimin e tipologjive dhe trendeve, pavarësisht se hedhja e të dhënave në këtë regjister duhet të përmirësohet;

- Miratimi i akteve nënligjore specifike për rritjen e cilësisë së hetimeve proaktive si lëshimi i Udhëzimit të Përgjithshëm i Prokurorit të Përgjithshëm<sup>5</sup>, ngritja e seksioneve në prokuroritë e juridiksionit të përgjithshëm për luftën kundër pastrimi të parave, miratimi i Aktit Normativ Nr. 1, datë 31.01.2020 “Për Masat Parandaluese në Kuadër të Forcimit të Luftës Kundër Terrorizmit, Krimit të Organizuar, Krimeve të Rënda dhe konsolidimit të Rendit e Sigurisë Publike”, hetimet sipas të cilit janë kryer kryesisht nga SPAK;
- Rritja e treguesve të lidhur me sekuestrimet dhe/ose konfiskimet, hetimeve financiare dhe pasurore;
- Rritja e kapaciteteve njerëzore nëpërmjet trajnimeve të ofruara qoftë me trajnimin vazhdues nëpërmjet Shkollës së Magjistraturës por dhe atyre të ofruara nga asistenca ndërkombëtare (BE dhe SHBA).

#### **Nisma të lidhura me formalizmin e ekonomisë:**

- Digjitalizimi i një sërë shërbimesh publike dhe financiare. Kjo shkon paralelisht edhe me përpjekjet e Bankës së Shqipërisë dhe bankave të nivelit të dytë për të rritur digjitalizimin e shërbimeve të pagesave, të cilat tashmë kanë rritur ndjeshëm përdorimin e kartave të pagesave;
- Implementimi i projektit të fiskalizimit si një masë e re për të adresuar informalitetin;
- Rritja e vazhdueshme e përdorimit të pagesave elektronike;
- Konsolidimi i mëtejshëm i kalimit të transaksioneve për pasuri të paluajtshme përmes sistemit financiar;
- Kontrollat e ushtruara nga administrata tatimore pranë biznesit me fokus respektimin e detyrimeve për kryerjen e transaksioneve në përputhje me legjislacionin tatimor;

#### **Ndryshime ligjore:**

- Miratimi i ndryshimeve në ligjin për parandalimin dhe pastrimin e parave me qëllim për afrimin me direktivat e lidhura të BE;
- Miratimi i Ligjit “Për profesionin e ndërmjetësit të pasurive të paluajtshme”;
- Ndryshimi i ligjit “Për Noterinë” në të cilat janë parashikuar kërkesa specifike në mënyrë që të parandalohet hyrja në këto profesione e personave të përfshirë në aktivitet kriminal apo që kanë lidhje të mundshme kriminale;
- Ndryshime ligjore në fushën e regjistrimit të biznesit në QKB, me synim rritjen e besueshmërisë së të dhënave të paraqitura për personin juridik/tregtar si vendosja e afateve kohore për njoftimin e ndryshimit të ortakut, njoftimin e listës së plotë të aksionerëve të

---

<sup>5</sup> Nr. 10, dt. 10.17.2020

regjistruar me të dhënat e tyre të identifikimit për aksionet nominative së bashku me bilancin vjetor kontabël, vendosjen e parashikimeve për masa administrative në rast mos respektimi të këtyre detyrimeve,

- Miratimi i një ligji të ri për regjistrimin e OJF, me synim konfirmimin dhe saktësimin e atyre që ushtrojnë aktivitetet dhe çregjistrimin e të tjerave jo më aktive apo që nuk kanë ushtruar aktivitetet;
- Miratimi i një kuadri ligjor dhe nisma për një sistem elektronik të ankesave në sektorin e prokurimeve publike, me qëllim rritjen e transparencës;

### **Digjitalizim i DB dhe regjistra të rinj:**

- Ngritja dhe funksionimi i regjistri të centralizuar të llogarive bankare;
- Ngritja dhe funksionimi i regjistri të pronarit përfitues;
- Progres të dukshëm në numrin e prona të regjistruara, me 100% (në zona urbane) dhe % (në zona rurale) të pronave të digjitalizuara.

Këto nisma, përveçse kontribuojnë në formalizimin e përgjithshëm të ekonomisë si dhe aksesit në të dhëna nga organet tatimore, rritin gjithashtu mundësitë e verifikimeve në kohë dhe më të sakta nga AIF dhe AZL, duke ofruar të dhëna të shpejta dhe më të besueshme/sakta për llogaritë bankare, pronësinë përfitues, zotëruesit e pasurive të paluajtshme.

### **Sistemi parandalues:**

- Rritja e numrit dhe larmishmërisë së RAD të dërguara nga subjektet e ligjit;
- RAD e dërguara nga subjektet e ligjit përkojnë me rreziqet e evidentuara në nivel vendi;
- Rritja e përputhshmërisë me kërkesat ligjore nga ana e subjekteve kryesisht financiare, por rritje e dukshme edhe e atyre jo financiare;
- Rritja e ndërgjegjësimit përmes trajnimeve, tipologjive etj.;
- Konsolidim i mëtejshëm i mbikëqyrjes mbi bazë risku;

### **Rritja e përputhshmërisë me standarde ndërkombëtare:**

- Në vitin 2023 Shqipëria nga 40 Rekomandimet e FATF ka të realizuara 37 rekomandimeve gjerësisht të plotësuara dhe të plotësuara (LC/C), 1 rekomandim ka qenë i paaplikueshëm (NA) në kohën e vlerësimit dhe 2 rekomandimeve pjesërisht përmbushura (PC), por në proces adresimi së shpejti;
- Përparimi në mënyrë të qëndrueshme në zbatimin e Planit të Veprimit të Task Forcës së Veprimit Financiar (FATF);

- Përafrimi i Ligjit PP/FT me direktivat përkatëse të BE.

Në të ardhmen do të vijojnë të mbeten prioritete të qeverisë lufta kundër korrupsionit, krimin të organizuar, terrorizimit, ekstremizmit të dhunshëm, reduktimi i ekonomisë informale si dhe zbatimi i plotë i reformës në drejtësi.

### **3.3 Rezultatet e Vlerësimit Kombëtar të Riskut**

Në zbatim të detyrimeve ligjore të brendshme, rekomandimeve të FATF, detyrimeve në kuadër të ratifikimit të konventave të fushës apo edhe direktivave të BE mbi parandalimin e përdorimit të sistemit financiar për qëllime të PP/FT, gjatë vitit 2023 është kryer Vlerësimi Kombëtar i Riskut për pastrimin e parave dhe financimin e terrorizmit në vendin tonë, i cili përbënte të kartërtin e këtij lloji që prej vitit 2012.

Vlerësimi i fundit ishte kryer në vitin 2019 me një metodologji të zhvilluar së brendshmi nga organet e përfshira, ndërsa këtë herë është vendosur të zbatohet metodologjia e Këshillit të Evropës, e vlerësuar si e përshtatshme dhe gjithëpërfshirëse për realizimin e këtij procesi.

AIF ka luajtur rolin koordinues në realizimin e Vlerësimit Kombëtar të Riskut ndërkohë që ky dokument është bazuar në kontributet e një sërë institucionesh publike (Policia e Shtetit, Prokuroria e Përgjithshme, Prokuroria e Posaçme, Drejtoria e Përgjithshme e Doganave, Tatimeve, Banka e Shqipërisë, Autoriteti i Mbikëqyrjes Financiare etj.) dhe të subjekteve private (banka, shoqëri transfertash, kontabilist etj.). Ky vlerësim ka marrë në konsideratë edhe kontekstin e të dhënave relevante nga raporte ndërkombëtare dhe kombëtare.

Nëpërmjet këtij dokumenti, synohet të sigurohet një njohje më e mirë e risqeve PP/FT, dhe marrjen e masave të përshtatshme për zbutjen e risqeve të identifikuara. Ky dokument është shoqëruar dhe me Planin e Veprimit përkatës, me masa konkrete të dakortësuara nga institucionet e përfshira në proces.

Përditësimi i Vlerësimit Kombëtar të Riskut bazohet në një analizë gjithëpërfshirëse të rreziqeve të PP/FT bazuar në komponentët sa vijon:

- Analiza e kërcënimeve që rrjedhin nga kriminaliteti, i cili shërben si burimi kryesor për të gjenerimin e të ardhurave kriminale;
- Analiza e personave që përfshihen në PP;
- Analiza e sektorëve ekonomikë të lidhur me PP;
- Analiza e sektorëve financiarë/të profesioneve të lira, të keqpërdorur për PP dhe FT;
- Karakteristikat ndërkufitare të PP;
- Analiza e rreziqeve të FT.

Më poshtë është paraqitur shkurtimisht një listë përmbledhëse e ngjarjeve kryesore të rrezikut të PP të identifikuar përmes këtij vlerësimi:

1. Pastrimi i fondeve nga një sërë veprash penale të kryera jashtë vendit (vepra penale të lidhura me trafikimin e lëndëve narkotike, apo edhe vepra penale të kryera nga krimi i organizuar<sup>6</sup>, vjedhja e pasurisë) nëpërmjet përdorimit të sistemit financiar formal, transportit ndërkufitar të parave cash, investimeve në pasuri të paluajtshme;
2. Pastrimi i fondeve nga mashtrimet (përfshirë mashtrimet kompjuterike dhe në fushën e investimeve në “platforma” investuese të pa licencuara), të kryera jashtë vendit ose në Shqipëri nga individë apo grupet e organizuara kriminale përmes përdorimit të sistemit financiar me pasojë transferimin e fondeve në juridiksione të tjera, tërheqjen në para cash;
3. Pastrimi i fondeve nga krimet që lidhen me fushën e tatimeve (fshehja e të ardhurave dhe mashtrimi i TVSH), duke përdorur personat juridik rezident, duke mos deklaruar bilance dhe faturimet reale, nëpërmjet regjistrimit të personave juridik që nuk kryejnë aktivitet real në Shqipëri (shoqëri fiktive), nëpërmjet përdorimit të sistemit financiar formal, investimeve në pasuri të paluajtshme;
4. Pastrimi i të ardhurave nga korrupsioni përmes përdorimit herë pas here të palëve të treta (individë dhe persona juridik) që shërbejnë për të kamufluar mekanizmin, integrimi i mëvonshëm në instrumente financiare, pasuri të paluajtshme brenda vendit, apo biznese.
5. Pastrimi i parave duke përdorur persona juridikë rezident (kryesisht të formës shpk<sup>7</sup> dhe më rrallë forma të tjera juridike) ose persona të tretë individë brenda ose jashtë rrethit të ngushtë të personit që është gjenerues i të ardhurave kriminale;
6. Përfshirja e mundshme e profesionistëve nëpërmjet dhënies së këshillave me qëllim mundësimin e procesit të pastrimit të parave.

Ngjarjet e riskut për financim terrorizmi/terrorizëm të identifikuar përmes këtij vlerësimi janë si më poshtë:

1. Risku i ekstremizmit dhe radikalizmit me frymëzim ideologjik, fetar të cilat mund të mbështesin apo ushqejnë potencialisht veprimtaritë terroriste/financuese të terrorizmit;
2. Kërcënimin e mundshëm nga të rikthyerit nga zonat e konfliktit nëpërmjet përhapjes së ideologjive ekstremiste, përdorimi i përvojës së luftës në indoktrinimin e personave të tjerë, përhapja e tensioneve shoqërore<sup>8</sup>. (Figura është ilustruese dhe mund të pershtatet/modifikohet sipas nevojës, duke supozuar që formatimi final do behet nga një program grafik i avancuar)

---

6 Kryesisht veprat penale të lidhura me krimin e organizuar janë trafikimi i lëndëve narkotike, vjedhja, mashtrimi.

7 Nisur kjo nga fakti se kjo lloj forme regjistrimi në vendin tonë është forma më e pëhapur e regjistrimit të subjekteve juridike.

8 Strategjia Ndërsektoriale për Parandalimin e Ekstremizmit të Dhunshëm dhe Luftën Kundër Terrorizmit dhe Planet e Veprimit.






**Faktorët e brendshëm të kërcënimit:**

**Hyn tek kërcënimet me faktor të jashtëm. Mjedisi strategjik i sigurisë, niveli rajonal. Bazuar në SSK 14/2024 dhe Strategjinë Ushtarake.** Shqipëria është një vend me pozitë gjeografike të favorshme si për transportin e mallrave po ashtu njerëzve pasi shtrihet në Evropën Juglindore, në Perëndim të Gadishullit Ballkanik dhe kufizohet në veri nga Mal i Zi, në veri-lindje nga Kosova, në lindje me Maqedoninë e Veriut, në jug dhe jug-lindje kufizohet me Greqinë ndërsa në perëndim laget nga deti Adriatik dhe deti Jon. Kjo pozitë gjeografike mund të keqpërdoret për qëllime kriminale, si kontrabanda e mallrave dhe trafikimi i drogës, i qenieve njerëzore, etj.

**Faktorët kontekstualë:** Shumica e rreziqeve të PP/FT të përshkruara në këtë raport ndikohen nga faktorë kontekstualë, duke përfshirë nivelin e ekonomisë informale pavarësisht tendencës pozitive të uljes së tij, numri i lartë i shtetasve shqiptarë që kanë emigruar jashtë vendit duke ndikuar kështu edhe në përhapjen apo krijimin e lidhjeve të krimit ndërkombëtar.

Përditësimi aktual evidentoi se gjithashtu, në përgjithësi, aktivitetet e trafikimit të lëndëve narkotike, vepra penale të kryera në formën e krimit të organizuar, krimet tatimore, korrupsioni, mashtrimi (duke përfshirë mashtrimin kompjuterik) shfaqen si vepra penale kryesore të gjenerimit të fondeve për skemat e PP në vendin tonë.



### Subjektet:

**Individët rezident:** Në Shqipëri vazhdojnë të jenë grupi më i madh i subjekteve të përfshira në aktivitete me potencial pastrimin e parave.

Skenarët e rrezikut më të lartë që lidhen me individët janë :

- Blerje pasurish me burim të panjohur apo të pajustificuar;
- Përfitimi i transfertave të shpeshta dhe në vlera të vogla nga individë pa një lidhje të qartë mes tyre;
- Depozitimi në llogari bankare të shumave cash me burim të panjohur ;
- Blerje pasurish të paluajtshme nën vlerë dhe rivlerësim brenda një kohe të shkurtër;
- Veprime financiare (depozitim/ transfertat/ investim në pasuri të paluajtshme/ luajtshme) nga persona të dyshuar si të përfshirë në veprimtari kriminale;
- Investim në vlerë të lartë në pasuri të paluajtshme nëpërmjet përdorimit të personave të tretë;

**Personat juridik rezident:** Vazhdojnë të përfaqësojnë numrin e dytë më të madh të subjekteve të përfshirë në aktivitetin e mundshëm të PP, kryesisht me burim të ardhurash nga krime në fushën tatimore, mashtrimi, krimi i organizuar, korrupsioni ku skenarët kryesorë përfshijnë:

- Vendosija e fondeve me origjinë të panjohur në qarkullimin real tregtar;
- Investim në pasuri të paluajtshme emër të shoqërisë ekzistuese të zotëruar nga persona të dyshuar si të përfshirë në veprimtari kriminale në vlera të pajustificuara me burime të ligjshme;

- Përfitimi i transfertave të larta në llogari biznesi të personit të dyshuar si i përfshirë në veprimtari kriminale nga shoqëri pa një lidhje të qartë mes shërbimit/mallit të ofruar dhe pagesës;
- Përfshirja e një individi të vetëm në disa subjekte të cilat kanë të njëjtin objekt veprimtari apo të njëjtën adresë dhe kryerja e transaksione pa një lidhje të qartë midis palëve të transaksionit;
- Transferata të dyshimta të përfituara në llogari të një shoqërie, që nuk ka aktivitet të mirëfilltë ekonomik;
- Përdorimi i subjekteve juridike për përfitimin e transfertave nga jashtë nëpërmjet mashtrimit ku pjesa dërmuese e fondeve kanalizohen jashtë vendit dhe një pjesë tërhiqen cash;

**Individët jo rezident:** Skenarët kryesorë të lidhur me këtë kategori janë:

- Krijimi dhe regjistrimi i subjekteve juridike rezidente dhe përdorimi i llogarive të tyre bankare për marrjen apo dërgimin e transfertave nga/drejt juridiksioneve të ndryshme pa një lidhje të qartë me objektin e veprimtarisë së shoqërisë me dyshime të lidhura kryesisht me evazionin fiskal;
- Realizimi i investimeve kryesisht rezidenciale pa një burim të qartë të ardhurave.

**PEP Resident<sup>9</sup>:** Për shkak të funksionit të tyre rastet e dyshuara të lidhura me PEP janë kur vepra të origjinës vlerësohet të ketë qenë “Shpërdorim detyre/Korrupsion” dhe ndër skenarët kryesorë janë:

---

<sup>9</sup> Sipas nenit 2 pika 10 e ligjit PP/FT PEP do të konsiderohen: a)Individët, të cilët janë të detyruar të bëjnë deklarinim e pasurive të tyre në përputhje me legjislacionin në fuqi për deklarinim dhe kontrollin e pasurive, të detyrimeve financiare të të zgjedhurve dhe të disa nëpunësve publikë, me përjashtim të nëpunësve të nivelit të mesëm apo të ulët drejtues, pavarësisht nëse kanë detyrimin për deklarinim sipas legjislacionit në fuqi për deklarinim dhe kontrollin e pasurive, të detyrimeve financiare të të zgjedhurve dhe të disa nëpunësve publikë; b)Individët, të cilët kanë ose kanë pasur funksione të rëndësishme si brenda vendit apo jashtë vendit në një qeveri dhe/ose në një shtet të huaj, të tillë si: kryetar shteti dhe/ose qeverie, ministra, zëvendësministra ose pozicione të ngjashme me to, anëtarë të Kuvendit ose organeve legjislative të ngjashme, politikanë të lartë, anëtarë të organeve drejtuese të partive politike, gjyqtarët e gjykatave të larta ose kushtetuese, si dhe çdo gjyqtar i një gjykate, ndaj vendimeve të së cilës nuk mund të ushtrohen mjetet e zakonshme të ankimit, anëtarët e organeve drejtuese të bankave qendrore, ambasadorët dhe të ngarkuarit me punë, si dhe oficerët me gradë madhore në Forcat e Armatosura, drejtuesit e lartë dhe/ose anëtarët e organeve drejtuese të shoqërive shtetërore, si dhe drejtorët, zëvendësdrejtorët ose anëtarët e bordit ose çdo pozicion tjetër i ngjashëm me to në një organizatë ndërkombëtare. Individët e përcaktuar në shkronjat “a” dhe “b” të kësaj pike do të konsiderohen “persona të ekspozuar politikisht” deri në 3 (tre) vjet pas largimit nga funksioni.

- Investime në vlera të larta në një biznes mbas mbarimit të detyrës (ish PEP) pa një burim të qartë të ardhurave apo edhe deklarimi i fitimeve të larta të menjëhershme nga një biznes i zotëruar nga një ish PEP;
- Qarkullim fondesh të larta në llogaritë individuale nga PEP deklaruar nga biznesi, por të pajustificuara nga të ardhurat e biznesit;
- Investime në pasuri të paluajtshme mbas mbarimit të detyrës pa një burim të qartë të ardhurave ;
- Investime në pasuri nga PEP me vlerë të deklaruar nën çmim tregu;
- Vendosja fillestare e administratorëve/përfaqësuesve ligjor por edhe e ortakëve të personave juridik pa të dhëna për aktivitet kriminal, por dukshëm pa përgatitje të duhur në kulturë ekonomike apo arsimore për të zotëruar ose zhvilluar aktivitete të tilla tregtare, që zotërohen *de facto* nga PEP dhe që më pas kalohen në emër të tyre. Një pjesë e këtyre shoqërive, në raste sporadike, janë të përfshira në fushën e prokurimeve publike.

**Sektorët ekonomik:** Ky vlerësim identifikoi disa sektorë ekonomikë, të cilët janë të përdorur më shpesh për aktivitete të PP në faza të ndryshme. Sektorët ekonomikë më të ndjeshëm ndaj aktivitetit të PP janë: Sektori i Pasurive të Paluajtshme, Tregtia, Sektori i Shërbimeve Telematike (Call Center)<sup>10</sup>, Konsulenca në fushën ekonomike dhe ligjore. Skemat rast pas rasti përfshijnë edhe elementë ndërkombëtar, të krijuara qëllimisht apo edhe përfshirje të bizneseve ekzistuese, elementë të cilat synojnë të pengojnë identifikimin, gjurmimin e burimit dhe qëllimin përfundimtar të përdorimit të të ardhurave kriminale.

### **Përdorimi i sistemit financiar dhe jofinanciar:**

Për sa i përket përdorimit si kanal për rastet e dyshuara të pastrimit të parave ky vlerësim identifikoi se kanalet më të përdorur janë sistemi bankar, bizneset dhe profesionet e caktuara jofinanciare (kryesisht noter).

Ky rezultat bazohet në disa aspekte si natyra e ekonomisë së vendin tonë e cila përfshin kategori subjektsh tradicionalë dhe të përqendruar kryesisht në sektorin bankar, ndërkohë që subjektet e tjera financiare janë ende me zhvillim minimal krahasuar me bankat.

Përdorimi i sistemit bankar është i pashmangshëm në një apo më shumë faza të pastrimit të parave (vendosja, shtresëzimi, integrimi), për shkak kjo të natyrës së qenësishme të operacionit bankar, zhvillimit të tij dominues në vendin tonë krahasuar me subjekte të tjera financiare, madhësisë dhe rëndësisë së tij, si dhe për shkak të numrit të madh të klientëve apo transaksioneve të kryera në emër të tyre. Ndërsa sektori bankar në parim ka një ekspozim të lartë ndaj rreziqeve të pastrimit të

---

<sup>10</sup> Në kuadër të këtij dokumenti risku i referohet subjekteve që kryesisht ushtrojnë veprimtari për investime në platforma të palicesnuara (bursa fiktive, kriptomonedha etj)

parave, vlerësohet se ka ndërgjegjësim të mirë dhe mjete të përshtatshme dhe për t'i zbuluar ato. Kjo është konfirmuar nga një nivel i lartë raportimi të RAD ndër vite jo vetëm në nivel numerik por edhe për sa i përket cilësisë së tyre. Kështu si indicie për informacionet e dërguara nga AIF në organet ligjzbatuese në 90-95% të rasteve kanë shërbyer RAD e dërguara nga sektori bankar.

Profesioni i noterit është perceptuar dhe ka rezultuar edhe nga të dhënat si më i rrezikuar krahasuar me subjektet/profesionet e tjera për shkak se noteri në Shqipëri kryen një gamë të gjerë të veprimeve juridike (huadhënie, kontrata kredie, çelje trashëgimie etj.), për pjesën më të madhe e të cilave është mundësia e vetme për veprimet, përfshirë këtu edhe transaksionet e pasurive të paluajtshme.

### Produktet më të përdorura:

Analizimi i të dhënave të disponueshme në kuadër të këtij vlerësimi tregoi se produktet më të përdorur për pastrimin e produkteve të veprës penale bazuar në analizë janë: transfertat hyrëse/dalëse me dhe nga jashtë vendit, tërheqje/depozitim i fondeve, transferimi i fondeve brenda vendit.

Për sa i përket përdorimit të transfertave bankare ndër karakteristikat që i bëjnë ato tërheqëse për rastet e pastrimit të parave janë: Vështirësia për të monitoruar ose kontrolluar transfertat elektronike, në nivel të njëjtë me produktet të tjera bankare për shkak të vëllimit të transaksioneve; fondet mund të transferohen përmes juridiksioneve të ndryshme, në mënyrë që të humbasin gjurmët e burimit të fondeve, apo transferimet mund të bëhen nga një numër i madh llogarish bankare në depozitat që janë krijuar për të humbur gjurmët e llogarisë kryesore shpesh të vendosur jashtë vendit.

Për sa i përket përdorimit të parasë cash ndër karakteristikat që i bëjnë ato tërheqëse për rastet e pastrimit të parave janë: fshehja e origjinës së të ardhurave dhe vështirësinë në gjurmimin e këtyre të ardhurave.

**Tabela për nivelin e riskut për pastrim parash sipas komponentëve të ndryshëm**

<b>Përshkrimi</b>	<b>Niveli i Riskut</b>
<b>Veprat penale të vlerësuara</b>	
<i>Prodhim, shitje, trafikim të lëndëve narkotike dhe lendeve psikotrope</i>	I lartë
<i>Korrupsion dhe shpërdorim detyre</i>	I lartë
<i>Krimi i Organizuar</i>	I lartë
<i>Mashtrimi</i>	I lartë
<i>Veprat penale në fushën e taksave dhe tatimeve</i>	I lartë
<i>Vjedhja e pasurisë</i>	Mesatar
<i>Falsifikimi</i>	Mesatar
<i>Krime në fushën doganore</i>	Mesatar
<i>Trafikim i qenieve njerëzore/ shfrytëzim prostitucioni</i>	Mesatar

<b>Produktet Bankare</b>	
<i>Transferta brenda dhe jashtë vendit</i>	I lartë
<i>Veprimet në cash</i>	I lartë
<i>Kredi</i>	Mesatar
<i>E-banking</i>	I ulët
<i>Garanci Bankare</i>	I ulët
<i>Blerje me kartë</i>	I ulët
<b>Subjektet (Individë, PJ, PEP, etj.)</b>	
<i>Individ Rezident</i>	I lartë
<i>Personat Juridik Rezident</i>	I lartë
<i>Individ jo rezident</i>	Mesatar
<i>Personat juridik jo rezident</i>	I ulët
<i>Personat e Ekspozuar Politikisht</i>	I lartë
<b>Subjektet financiare</b>	
<i>Banka</i>	I lartë
<i>Tregu i sigurimeve dhe Tregu i Kapitalit dhe Fondeve</i>	I ulët
<i>Shoqëritë e Transfertave</i>	Mesatar
<i>ZKV</i>	Mesatar
<i>Mjetet Virtuale</i>	Mesatar
<i>Qira Financiare</i>	I ulët
<i>Factoring</i>	I ulët
<i>SHKK</i>	I ulët
<i>Pagesat Elektronike</i>	I ulët
<i>Mikrokredi</i>	I ulët
<b>Subjektet jo financiare</b>	
<i>Noter</i>	I lartë
<i>Audituesit Ligjor/ Kontabilistët e miratuar</i>	Mesatar
<i>Lojërat e Fatit/Kazino</i>	Mesatar
<i>Ndërmjetësit e pasurive të paluajtshme</i>	Mesatar
<i>Tregtim i mjeteve motorike</i>	Mesatar
<i>Tregtarët e gurëve të çmuar</i>	I ulët
<i>Avokat</i>	I ulët
<b>Sektorët Ekonomik</b>	
<i>Sektori i pasurive të paluajtshme dhe Ndërtimi</i>	I lartë
<i>Sektori i shërbimeve telematike (call center)</i>	I lartë
<i>Sektori i tregëtisë</i>	Mesatar
<i>Shërbimet e konsulencës ekonomike, ligjore</i>	Mesatar
<i>Sektori i hidrokarbureve dhe energjitikës</i>	Mesatar
<i>Sektori i Mjekësisë</i>	Mesatar

<i>Sektori i Shërbimeve</i>	Mesatar
<i>Sektori i Turizmit</i>	Mesatar
<i>Sektori i teknologjisë së informacionit</i>	I ulët

**Tabela për nivelin e riskut për financim terrorizmi sipas komponentëve të ndryshëm**

<b>Përshkrimi</b>	<b>Niveli i Riskut</b>
<b>Skenarë rreziku</b>	
<i>Ekstremizmi dhe radikalizmi të cilat mund të çojnë/ushqejnë potencialisht veprimtaritë terroriste/financuese të terrorizmit</i>	Mesatar
<i>Kërcënimin e mundshëm nga të rikthyerit nga zonat e konfliktit nëpërmjet përhapjes së ideologjive ekstremiste</i>	Mesatar
<b>Kanale/Produkte</b>	
<i>Transportimin e parave cash në kufi</i>	Mesatar
<i>Subjektet financiare jobankë për shërbimin e transfertës së parave</i>	Mesatar

### 3.4 Konteksti ndërkombëtar

Natyra globale e kërcënimeve të PP/FT kërkon një përgjigje të koordinuar ndërkombëtare. Shqipëria punon ngushtë me organizatat ndërkombëtare dhe aleatët kyç për të adresuar efektivisht kërcënimet komplekse dhe në zhvillim të sigurisë, përfshirë PP/FT. Nëpërmjet bashkëpunimit ndërkombëtar, Shqipëria dhe aleatët e partnerët e saj mund të identifikojnë më efektivisht trendet globale të PP/FT, të ndajnë informacion për të kontribuar në hetimet me elemente transnacionale dhe të zhvillojnë praktika të mira ndërkombëtare për të parandaluar, zbuluar dhe ndaluar PP/FT. Më poshtë janë disa shembuj të disa organizatave ndërkombëtare dhe partnerëve kyç për Shqipërinë në fushën e parandalimit dhe luftës ndaj PP/FT:

- **Grupi i Posaçëm i Veprimit Financiar (FATF):** FATF është rojtari global i pastrimit të parave dhe financimit të terrorizmit. Ky organizëm ndërqeveritar vendos standardet ndërkombëtare që synojnë të parandalojnë PP/FT dhe përhapjen e armëve të shkatërrimit të masës, si dhe dëmin që këto veprimtari të paligjshme shkaktojnë për shoqërinë. Shqipëria ka bashkëpunuar ngushtësisht me këtë organ, veçanërisht gjatë periudhës së qëndrimit në listën gri dhe adresimit të mangësive të evidentuara.
- **Komiteti i Ekspertëve për Vlerësimin e Masave Kundër Pastrimit të Parave dhe Financimit të Terrorizmit (MONEYVAL)** - Moneyval është një organizëm rajonal bijë i

FATF dhe një organ monitorues i përhershëm i Këshillit të Evropës, të cilit i është i besuar detyra e vlerësimit të përputhshmërisë me standardet kryesore ndërkombëtare për luftën kundër PP/FT dhe efektshmërinë e zbatimit të tyre, si dhe me detyrën e bërjes së rekomandimeve për autoritetet kombëtare në lidhje me përmirësimet e nevojshme në sistemet e tyre. Shqipëria është anëtare e rregullt e Moneyval dhe punon në mënyrë aktive me të. Pjesëmarrja në këtë organizëm i mundëson Shqipërisë të monitorojë trendët dhe tendencat më të fundit në fushën e PP/FT, të vlerësohet në ne lidhje me parandalimin dhe luftën kundër PP/FT të ndikojë dhe të mbështesë aktivitetet dhe përpjekjet e PPP/FT të vendeve anëtare rëndësi të veçantë për Shqipërinë.

- **Grupi Egmont i Njësive të Inteligjencës Financiare:** AIF është anëtare prej vitit 2003 e Grupit Egmont, qëllimi i të cilit është të rrisë bashkëpunimin dhe shkëmbimin e informacionit në lidhje me PP/FT midis vendeve anëtare. Aktualisht i përbërë nga NjIF nga mbi 160 juridiksione, qëllimet e Grupit Egmont janë që të nxisë komunikimin dhe të përmirësojë shkëmbimin e informacionit, inteligjencës dhe ekspertizës midis rrjetit ndërkombëtar NjIF. Shqipëria luan një rol aktiv në takimet e Grupit Egmont, si dhe shkëmben rregullisht informacione me NJIF partnere.

Të tjera anëtarësime apo angazhime/detyrime ndërkombëtare që mund të shtohen.

Rrjeti rajonal i projektit për mos përhapjen e armëve të dëmtimit në Masë (C-WMD) nën organizimin e DTRA dhe Racviac. (Ketu, nëse gjykohet se është e vlefshme dhe lidhet me thelbin dhe logjikën e materialit, duhet sqaruar shkurtimisht si në rastet me sipër)

Paralelisht me pjesëmarrjen dhe rolin përkatës në organizatat dhe rrjetet ndërkombëtare dhe rajonale, një dimension tjetër të rëndësishëm për reputacionin dhe pozicionimin në arenën ndërkombëtare përbejnë edhe vlerësimet nga autoritete/organizma prestigjioze. Shqipëria përveç vlerësimit nga Moneyval, ashtu si edhe vende të tjera, vlerësohet edhe nga disa institucione apo organizma të tjerë ndërkombëtare ku ndër më kryesoret përmendim:

- **“Basel AML Index - Ranking money laundering and terrorist financing risks around the world”** i publikuar nga Qendra Ndërkombëtare për Rekuperimin e Aseteve (International Centre for Asset Recovery) pranë Institutit të Bazelit për Qeverisje (Basel Institute on Governance). Raporti i fundit është publikuar në 2023<sup>11</sup>.

Rezultatet e Institutit të Bazelit mbi Qeverisjen nxirren nga përpunimi i agreguar i 18 indikatorëve që lidhen me kuadrin ligjor dhe rregullativ të PPP/FT, korrupsionin dhe standardet financiare duke përdorur burime publike si FATF që zënë vend parësor, Raporti i DASH për pastimin e parave, Transparency International, Banka Botërore etj. Që prej vitit 2012 ky Institut realizon publikime të renditjes së vendeve sipas riskut për PPP/FT, renditje e cila nuk synon krahasimin mes vendeve

---

<sup>11</sup> [https://index.baselgovernance.org/api/uploads/Basel\\_AML\\_Index\\_2023\\_12th\\_Edition\\_879b07b7b2.pdf](https://index.baselgovernance.org/api/uploads/Basel_AML_Index_2023_12th_Edition_879b07b7b2.pdf)



por krijimin e një panoramë të përgjithshme mbi nivelin e riskut të secilit vend dhe progresit të tij në kohë.

Objektivi i Institutit është që të ofrojë një renditje sipas riskut të vendeve për PPP/FT, por jo që të masë nivelin e “pastrimin e parave” pasi nuk ka të dhëna të besueshme për të arritur në këtë vlerësim.

Shkalla aktuale e renditjes është nga 0 ( risk i ulët) deri në 10 ( risk i latë) dhe ndahet në tre nivele risku: 0 - 3.3 ( risk i ulët); 3.3 – 6.6 (risk mesatar) dhe 6.6 – 10 (risk i lartë).

Kështu, në raportin e vitit 2023 janë përfshirë 152 vende dhe në nivel global Shqipëria renditet me pikëzim 4.75, vendi i 93. Nëse krahasojmë renditjen me vitet e kaluara, vendi ynë ka bërë progres të ndjeshëm në pozicionim. Në vitin 2022 Shqipëria renditej me pikëzim 4.92 (në vendin e 74) ndërsa në vitin 2021 renditej me pikëzim 5.72 (në vendin e 39).

- **“International Narcotics Control Strategy Report Volume II Money Laundering”** i publikuar nga Departamenti Amerikan i Shtetit. Raporti i fundit është publikuar në mars 2022<sup>12</sup>;

Në Raportin e DASH për pastrimin e parave, që i referohet të dhënave për vitin 2021, Shqipëria renditet në listën e Major Money Laundering Jurisdictions. Në këtë listë me të njëjtin status janë 84 shtete në mbarë botën, ndër të cilat edhe Belgjika, Kanadaja, Kina, Italia, Hollanda, Spanja, Zvicra, Mbretëria e Bashkuar, SHBA etj.

Sipas DASH, statusi si major money laundering country përcaktohet nëse institucionet financiare hasin në transaksione ku përfshihen shuma domethënëse nga aktiviteti i trafikimit ndërkombëtar të drogës dhe lidhet me Raportin e DASH për narkotikët. Përfshirja në këtë listë, nuk është tregues që shteti nuk po bën përpjekje të forta për të luftuar pastrimin e parave, apo që nuk përmbush standardet ndërkombëtare të fushës. Kjo, nuk është një “listë e zezë” dhe nuk ka sanksione të lidhura me të.

Në përmbledhjen e vlerësimit për Shqipërinë raporti citon: “Ndërsa Qeveria e Shqipërisë ka bërë përparime në parandalimin e PP në vitin 2021, mbetet shumë më tepër për të bërë. Më 1 korrik 2021, një ligj i ri që kërkon nga kompanitë të regjistrojnë edhe pronarët përfitues dhe llogaritë bankare hyri në fuqi. Ligji lejon qasje në kohë reale për autoritetet e zbatimit të ligjit dhe analizën e të dhënave që do të lehtësojë më mirë hetimet e PP dhe krimet financiare dhe gjurmimin e pasurive të paligjshme. Shqipëria adoptoi më tej kërkesa të reja që kërkojnë që të gjitha transaksionet të regjistrohen elektronikisht dhe raportohen në autoritetet e taksave në kohë reale. Shqipëria mbetet e ndjeshme ndaj PP për shkak të korrupsionit, pranisë së rrjeteve të krimit të organizuar dhe hendekëve në legjislacion dhe mbikëqyrje. Shqipëria ka një ekonomi të madhe të parave cash dhe sektor informal, me hyrje të konsiderueshme të remitançave dhe investimeve nga jashtë. Trafikimi i substancave narkotike dhe aktiviteti i krimit të organizuar janë burimet kryesore

---

<sup>12</sup> <https://www.state.gov/wp-content/uploads/2022/03/22-00768-INCSR-2022-Vol-2.pdf>

të fondeve të pastruara. Organizatat kriminale shqiptare kanë lidhje me rrjetet që operojnë gjerësisht në të gjithë Evropën dhe në Amerikën e Jugut. Shqipëria vazhdon të përdorë ligjin e saj Anti Mafia për konfiskimin e për të sekuestruar kompanitë e lidhura me trafikimin e drogës dhe korrupsionin. Reforma gjyqësore në proces ka përmirësuar shanset e Shqipërisë për të adresuar PP. Këto përpjekje, megjithatë, ende pengohen nga sfidat e kapacitetit, mbikëqyrja e pamjaftueshme e disa sektoreve dhe nevoja për të përmirësuar bashkëpunimin mes organiteteve të zbatimit të ligjit dhe mbikëqyrëse”.

- **Progres Raporti për Shqipërinë 2023**, i publikuar nga Komisioni Europian. Raporti i fundit është publikuar më nëntor 2023

Raporti nënvizon se Shqipëria ka njëfarë niveli përgatitjeje në **luftën kundër krimit të organizuar**, me një nivel të mirë e të vazhdueshëm bashkëpunimi me Shtetet Anëtare të BE-së dhe me agjencitë e BE-së. Duhet të bëhen më shumë përpjekje në luftën kundër drogave të paligjshme, duke përfshirë rritjen e kapaciteteve të autoriteteve të zbatimit të ligjit. Progresi që është arritur me sekuestrimin dhe konfiskimin e aseteve të lidhura me krimin e organizuar duhet të vazhdojë. Përpjekjet duhet të vazhdojnë gjithashtu për të siguruar një rritje të numrit të ndjekjeve penale dhe dënimeve përfundimtare, veçanërisht në rastet e nivelit të lartë, si dhe për të krijuar zyrën e rikuperimit të pasurisë. Lufta kundër krimit kibernetik, pastrimit të parave, si dhe parandalimit dhe luftës kundër trafikimit të qenieve njerëzore mbeten fusha ku nevojiten më shumë rezultate.

### **3.5 Mjedisi aktual dhe trendet e sektorit financiar**

Mjedisi i pastrimit të parave dhe financimit të terrorizmit po evoluon vazhdimisht. Për të mbetur relevant dhe efektiv, regjimi PPP/FT duhet të mbajë ritmin me trendet e reja që lindin në sektorët e rëndësishëm, si dhe me zhvillimet ndërkombëtare dhe vendore. Në të njëjtën kohë, regjimi PPP/FT duhet të monitorojë dhe të adaptohet vazhdimisht ndaj rreziqeve të pastrimit të parave dhe financimit të terrorizmit që dëmtojnë integritetin e sistemit financiar dhe paraqesin një kërcënim për sigurinë kombëtare.

Teknologjia ka avancuar shpejt në vitet e fundit, me tendenca të rëndësishme drejt digitalizimit në veçanti në sektorin financiar. Kjo përfshin:

- zhvillime të lidhura me monedhat virtuale, që ofrojnë mënyra të reja për të lëvizur vlera me një gradë të caktuar anonimiteti;
- zhvillimin e teknologjive financiare të reja (fintech), që po ndryshojnë mënyrat se si njerëzit ndërveprojnë me sistemin financiar; dhe
- njohja e identitetit digjital, që mund të lehtësojë verifikimin e identitetit dhe proceset e detyrimeve të klientëve.

Shumë nga këto teknologji të reja kalojnë kufijtë ndërkombëtarë dhe shpesh nuk kërkojnë një prani fizike për të ofruar shërbime. Koordinimi në nivel global është jetësor për të adresuar rreziqet e pastrimit të parave dhe financimit të terrorizmit që shkaktohen nga këto teknologji të reja, si dhe për të përfituar si nga mundësitë që ato ofrojnë për përputhshmërinë me rregullat e PPP/FT ashtu edhe për rritjen ekonomike. Pandemia COVID-19 ka përshpejtuar këtë trend drejt digjitalizimit, me më shumë konsumatorë financiarë që përdorin kanale digjitale, si dhe me shërbime dhe produkte financiare të reja që bëhen të disponueshme nga teknologjitë në zhvillim. Pandemia gjithashtu ka treguar se aktorët kriminalë po adaptohen në kontekstin aktual duke përdorur skema online dhe mashtrime të lidhura me COVID-19 për të prodhuar fonde. Ky kalim drejt platformave dhe produkteve digjitale mund të prezantojë edhe mundësi të reja për kriminelët dhe organizatat terroriste për të lëvizur fonde. Përvojat e reja nga pandemia COVID-19 përforcojnë rëndësinë e monitorimit dhe kuptimit të rreziqeve të reja në mënyrë të vazhdueshme nga autoritetet kombëtare dhe sektori privat.

### **3.6 Konteksti i Sigurisë Kombëtare**

Parandalimi dhe lufta ndaj pastrimit të parave dhe financimit të terrorizmit janë prioritet të qeverisë shqiptare, pasi këto fenomene paraqesin rrezik për ekonominë kombëtare, sistemin financiar dhe për sigurinë e qytetarëve.

Korniza e sigurisë kombëtare të Shqipërisë ka si prioritet mbrojtjen e sigurisë dhe përmbushjen e nevojave të qytetarëve të saj. Agjencitë dhe organet shtetëroë me detyra për të mbrojtur qytetarët dhe interesat e Shqipërisë koordinojnë dhe bashkëpunojnë për të ofruar iniciativa dhe programe në fusha kyçe. Këto përfshijnë adresimin e veprimtarive armiqësore nga aktorë shtetërorë; sigurinë kibernetike, hapësirën dhe teknologjitë në zhvillim; kundërshtimin e ekstremizmit dhe terrorizmit të dhunshëm; sigurinë kufitare; sigurinë mjedisore dhe shëndetësore; dhe lidhjen midis kriminalitetit të organizuar dhe sigurisë kombëtare, ndër të tjera. Edhe pse kërcënimet në këto fusha janë të ndryshme, veprimtaria kriminale në secilën fushë zakonisht mundësohet nga pastrimi i parave dhe/ose financimi i terrorizmit. Masat dhe mjetet kundër PP/FT janë gjithashtu të rëndësishme për parandalimin, zbulimin dhe luftën ndaj shmangies së sanksioneve.

Natyra transnacionale e rrjeteve kriminale moderne dhe teknikat që ata përdorin shtojnë kompleksitetin e adresimit të këtyre kërcënimeve, duke nënvizuar nevojën për bashkëpunim kombëtar dhe ndërkombëtar. Ky bashkëpunim operacional mund të zbulojë, shkatërrojë dhe parandalojë më efektivisht pastrimin e parave dhe financimin e terrorizmit, dhe të luftojë krimet dhe kërcënimet që ato mundësojnë. Kështu, përpjekjet kundër PP/FT janë të integruara në kornizën më të gjerë të sigurisë kombëtare dhe sigurisë publike të Shqipërisë.

Në situatën aktuale të sigurisë ndërkombëtare, vendi ynë mbetet një aktor i rëndësishëm dhe i angazhuar në funksion të ruajtjes së paqes dhe stabilitetit rajonal. Mjedisi i brendshëm i sigurisë i

vendit tonë është i qëndrueshëm, pa rreziqe imediate që të çojnë në cenim të integritetit territorial të vendit apo cenim të rendit kushtetues.

Si vend anëtar i NATO-s dhe vend kandidat në BE, me kontribute pozitive në vendimmarrjet ndërkombëtare për çështje të sigurisë ndërkombëtare, paqes dhe stabilitetit, Republika e Shqipërisë mbetet një vend me interes për aktorët keqdashës globalë. Angazhimi tyre pritet të intensifikohet në kuadër të rritjes së konfrontimit dhe qasjes agresive të shteteve kundërshtarë, duke synuar cënimin e arkitekturës aktuale të sigurisë ndërkombëtare dhe asaj evropiane, por edhe të qëndrimit dhe rolit aktiv të Shqipërisë në koordinim me këto organizma.

Në mjedisin strategjik në nivel kombëtar është shumë e rëndësishme evidentimi i rreziqeve që vijnë nga pastrimi i parave dhe financimi i terrorizmit, të vlerësuara gjerësisht në Vlerësimin Kombëtar të Riskut. Më konkretisht këto aktivitete çenojnë sigurinë ekonomike e cila mund të cenohet edhe nga përpjekjet e aktorëve globalë për të depërtuar në ekonomi për objektiva gjeoekonomike e me synime për ta përdorur ekonominë si mjet presioni politik. Krimet në ekonomi, gjithashtu, pavarësisht reformave konkrete për uljen e informalitetit, rritjes së forcës goditëse të agjencive ligjzbatuese në luftën kundër këtyre fenomeneve, vijojnë të jenë prezente e me impakt për ekonominë e vendit dhe rritjen e qëndrueshme të saj, forcimin e institucioneve shtetërore dhe sundimin e ligjit. Mbeten faktor me rrezikshmëri për rritjen e qëndrueshme ekonomike, besueshmërinë dhe stabilitetin e sistemit financiar, ekonomik në vend. Krimet në ekonomi janë sofistikuar nga teknologjitë e reja financiare dhe përbëjnë shqetësim për shkak të ndikimit në ekonomi. Pastrimi i parave dhe i produktit kriminal është problematikë prezente e me tendenca të larta impakti për ekonominë e vendit dhe sundimin e ligjit.

Korrupsioni dhe perceptimi mbi nivelin e tij minon besimin e publikut tek qeverisja e mirë dhe sundimi i ligjit, cenon zhvillimin e vendit, forcimin e institucioneve, rritjen e qëndrueshme ekonomike, si dhe mbetet faktor që ngadalëson dhe dëmton procesin e reformave, si dhe dekurajon investimet e brendshme e të huaja, të nevojshme për të krijuar mundësi punësimi për të gjithë.

Krimi i organizuar ende mbetet fenomen kompleks e dinamik, edhe pse është rritur ndjeshëm forca goditëse, janë forcuar kapacitetet kundërvënëse. Grupet/individët e përfshirë në krimin e organizuar, kryesisht në trafikun, prodhimin e lëndëve narkotike, pavarësisht goditjeve domethënëse të aktivitetit të tyre kriminal, pasurive dhe të ardhurave nga ky aktivitet, kanë treguar aftësi në adaptimin e mënyrave të veprimit në raport me kundërvënien. Të ardhurat e aktiviteteve kriminale të siguruara ndër vite nga shkalla e informalitetit, pandëshkueshmëria apo ndëshkueshmëria e ulët, favorizuar nga korrupsioni në sistemin e drejtësisë, ka sjellë injektimin në ekonominë formale dhe informale të parave të gjeneruara nga aktiviteti kriminal, zhvendosjen e elementëve të spikatur të grupeve kriminale në vendet e Evropës, por edhe të prodhimit e origjinës së lëndëve narkotike. Gjithashtu, përdorimi i teknologjive të informacionet nga rrjetet kriminale, si dhe zhvendosja e aktiviteteve të tyre në hapësirën kibernetike e vështirëson mundësinë e gjurmimit të tyre për t'i vënë para drejtësisë, duke ndikuar për rrjedhojë në rritjen e pandëshkueshmërisë së tyre. Këta elementë të integruar tashmë në rrjete ndërkombëtare të krimit

të organizuar vijojnë të nxisin e koordinojnë aktivitetin kriminal të grupeve dhe anëtarëve të tyre brenda vendit.

Terrorizmi dhe radikalizimi drejt ekstremizmit të dhunshëm, financimi i këtyre aktiviteteve, për shkak të influencave të jashtme dhe aktorëve dhe faktorëve të brendshëm e rajonalë do të vijojë të përbëjë rrezik për kohezionin dhe vlerat e shoqërisë shqiptare si dhe për harmoninë e bashkëjetesën tradicionale mes besimeve fetare në vend. Edhe pse në vendin tonë nuk ka pasur akte terroriste, ato nuk janë të përjashtuara për shkak të nxitjes e koordinimit nga organizata terroriste, prezencës së LHT-së nga vendi dhe rajoni ende të rreshtuar pranë këtyre organizatave, por edhe mbështetësve të tyre, të cilët të indoktrinuar nga propaganda online mund të veprojnë si aktorë të vetmuar. Influencat e jashtme të linjave ekstremiste fetare vijojnë të influencojnë proceset radikalizuese në vend me synim futjen e virusit të ekstremizmit në komunitetet e paqta fetare në vend, cenimin e harmonisë dhe bashkëjetesës mes besimeve fetare.

### **3.7 Pastrimi i parave dhe kërcënimet nga financimi i terrorizmit**

Ambienti i kërcënimeve dhe rreziqeve të pastrimit të parave dhe financimit të terrorizmit në Shqipëri ndryshon ndërsa metoda të reja për të pastruar paratë dhe financuar terrorizmin dalin me kalimin e kohës. Për të përmbushur këto zhvillime, AIF dhe disa nga aktorët e sistemit parandalues/ndëshkues, kryejnë vlerësime dhe publikojnë raporte inteligjente strategjike për të nxitur vetëdijen e subjekteve raportuese dhe të publikut në lidhje me rreziqet e reja që lindin.

Paralelisht me ndjekjen dhe publikimin e tendencave dhe materialeve edukuese, këto analizohen dhe shërbejnë edhe për evidentimin e mangësive që duhen adresuar. Këto mangësi, të evidentuara edhe nga vlerësimet ndërkombëtare, por edhe nga Vlerësimi Kombëtar i Rrezikut, prekin dimensione të ndryshme të sistemit parandalues të PP/FT. Më konkretisht të ndara sipas fushave kryesore ato janë:

#### **Sistemi parandalues:**

- Mos dërgim RAD dhe mungesë fokusi në fushën PP/FT nga kategori subjektsh në fushën e kontabilitetet siç janë auditues, kontabilist por edhe agjent të pasurive të paluajtshme;
- Dërgimi i një numri të kufizuar RAD nga kategori të veçanta, siç janë tregtimi i mjeteve motorike, ZKV, Shoqëritë e ndërtimit;
- Rritja në proces e bizneseve të lidhura me veprimtarinë e parasë elektronike, shoqërohet me nevojën për rritje fokusi për trajnime si të vetë subjekteve por edhe mbikëqyrësve.

#### **Mbikëqyrja:**

- Staf i kufizuar i ngarkuar me mbikëqyrje për çështjen e PPP/FT në mbikëqyrës kryesor që mblulojnë kategoritë më peshë dominuese të subjekteve raportuese;

- Rritje e bashkëpunimit për mbikëqyrje të përbashkëta lidhur me subjektet me risk më të lartë.

#### **Hetimi:**

- Pavarësisht rritjes së aksesit në DB të ndryshme, nevojitet shtrirje e mëtejshme këtij aksesit për personat që kryejnë hetime për pastrim parash, në të gjitha nivelet;
- Nevoja për rritje specializimesh dhe trajnimesh në nivel hetuesish/OPGJ por edhe Prokurorie, në mënyrë të posaçme për pastrimin e parave si vepër autonome, me përfshirje të palëve të tjera si dhe profesionist;
- Numri i kufizuar i çështjeve të hetuara, dërguara në gjykim, apo me vendim dënimi, për pastrim parash si vepër penale autonome, të kryer nga profesionistë apo nga palë e tretë, që nuk merr pjesë në krimin mëmë;
- Lëvizja e shpeshtë e stafit të specializuar në organet e hetimit.

#### **Informaliteti në ekonomi:**

- Pavarësisht masave të marra për uljen e parasë fizike, mbetet ende një instrument gjerësisht i përdorur, i cili në rastet e hetimeve, vështirëson gjurmueshmërinë e lëvizjes së fondeve si dhe përdorimin e tyre.

#### **Kontrolli kufitar:**

- Deklarimet në kufi të shumave mbi pragun e raportimit të parashikuar nga ligji PPP/FT vlerësohet të jenë ende në nivel të ulët.

Adresimi i këtyre mangësive së bashku me problematikat dhe çështjet e evidentuara gjatë këtij materiali do të jenë pjesë përbërëse përcaktimit të objektivave dhe masave përkatëse për arritjen e tyre që do të trajtohen në vijim.

## **IV. FUSHAT KRYESORE STRATEGJIKE**

Dokumenti orientues dhe udhërrëfyes për formulimin e çdo strategjie qeveritare në Shqipëri mbetet SKZHIE 2023-2030<sup>13</sup>. Kjo Strategji është dokumenti kryesor strategjik që jep drejtimit dhe përcakton përparësitë e zhvillimit të qëndrueshëm ekonomik e shoqëror të vendit në rrugën e integritit të tij në Bashkimin Evropian përfshirë edhe ndërlidhjen me Objektivat e Zhvillimit të Qëndrueshëm në funksion të arritjes së synimeve të Agjendës 2030 duke përcaktuar vizionin për zhvillimin e demokracisë, zhvillimin shoqëror dhe ekonomik të vendit gjatë periudhës 2024-2030. SKZHIE paraqet se si ky vizion do të arrihet përmes politikave dhe përparësive të mëposhtme:

<sup>13</sup> <https://qbz.gov.al/eli/vendim/2023/02/22/88/59519cb2-2180-4e7e-9d91-68545a68e008>

- Nxitjen e ritmeve të zhvillimit të vendit, duke gjeneruar rritje ekonomike të qëndrueshme, përmes një stabiliteti makroekonomik dhe financiar;
- Arritjen e standardeve që u shërbejnë qytetarëve, rritjes së mirëqenies dhe sigurimit të mbrojtjes së të drejtave të tyre;
- Transformimin e Shqipërisë në një vend me standarde, që mundësojnë anëtarësimin në Bashkimin Evropian;
- Ndërtimin e politikave që rrisin konkurrueshmërinë dhe rritjen ekonomike të vendit, krahasuar me vendet e rajonit dhe më tej.

Sipas SKZHIE vizioni për zhvillimin kombëtar të vendit është: ***Shqipëria 2030*** “Një ekonomi dinamike pjesë e Bashkimit Evropian dhe rajonit që ofron kushte të barabarta për rritjen e mirëqenies së të gjithë qytetarëve të saj mbështetur në një demokraci funksionale që garanton të drejtat themelore dhe liritë e njeriut.”

Strategjia Kombëtare për Parandalimin e PP/FT ndërthuret me SKZHIE në shtyllën e parë të kësaj të fundit: Demokracia e fuqizimi i institucioneve dhe qeverisjes së mirë e cila parashtrohet nevojën e forcimit të mëtejshëm të institucioneve efikase të vendit si bazë që siguron demokracinë, konkurrencën dhe zhvillimin ekonomik të vendit duke e përgatitur atë për anëtarësim në BE. Funksionimi i sistemit të drejtësisë, modernizimi i shërbimeve publike dhe digjitalizimi, arritja e standardeve të BE-së në administratën publike, lufta ndaj korrupsionit dhe siguri i llogaridhënies dhe transparencës në sektorin publik, zgjerimi i decentralizimit dhe demokracisë vendore si dhe përfshirja e qytetarëve dhe shoqërisë civile në këto procese mbeten përparësi kyçe të qeverisjes mirë për Shqipërinë.

Objektivat kryesorë të shtyllës së parë të SKZHIE që impaktojnë dhe ndërthuren me Strategjinë janë:

- 1) Reformimi i sistemit të drejtësisë
- 2) Forcimi i proceseve legjislativë dhe zgjedhore
- 3) Politika e jashtme
- 4) Menaxhimi i integruar i kufijve
- 5) Transparenca dhe lufta ndaj korrupsionit
- 6) Lufta kundër krimit të organizuar, terrorizmit dhe trafikimit

Ndërsa pesë masat e para kanë ndikim të tërthortë dhe indirekt me Strategjinë, masa e pestë “Lufta kundër krimit të organizuar, terrorizmit dhe trafikimit” lidhet direkt dhe ka pika të përbashkëta.

Ajo gjithashtu ka si referencë në “Acquis”, Kapitullin 24, “Drejtësia Liria dhe Siguria, Kapitullin 31 “Politika e Jashtme, e Sigurisë dhe e Mbrojtjes” dhe MSA Titulli VII “Liria, drejtësia dhe siguria” - Nëntitulli: Bashkëpunimi në luftën kundër pastrimit të parave dhe drogave të paligjshme dhe Nëntitulli: Bashkëpunimi kundër terrorizmit.

Një pjesë e objektivave kryesorë si më sipër ndërthuren edhe me gjetjet e vlerësimit kombëtar të riskut për PP/FT, siç janë rritja e efektivitetit në hetimin e veprave kryesore origjinuese të pastrimit të parave që lidhen me krimin e organizuar, korrupsionin.

## V. QËLLIMI, OBJEKTIVAT SPECIFIK DHE TREGUESIT E NIVELIT STRATEGJIK

Duke patur në konsideratë SKZHIE 2024-2030, si dokumenti kryesor strategjik, në vijim synohet të adresohen objektivat strategjik në luftën dhe parandalimin e PP/FT për periudhën 2024 – 2030, të shoqëruara me një plan (masash) veprimi, i cili mbulon periudhën 2024-2027.

Plani i veprimit përbëhet nga qëllimi kryesor dhe objektivat specifik të cilat përcaktojnë masat individuale të përfshira në to. Masat në planin e veprimit janë rezultat i përbashkët i dakordësuar i autoriteteve publike të përfshirë në luftën dhe parandalimin e pastrimit të parave dhe financimit të terrorizmit dhe mbikëqyrësit e sektorit privat.

Disa prej masave për reduktimin e risqeve të evidentuara në këtë vlerësim po merren tashmë në nivel kombëtar bazuar në strategji kombëtare të ndryshme si :

- Strategjia kundër Krimin të Organizuar dhe Krimeve të Rënda 2021-2025;
- Strategjia Ndërsektoriale e Luftës Kundër Terrorizmit 2021-2025 dhe Plani i Veprimit 2021-2023 dhe 2022-2025;
- Strategjia Ndërsektoriale e Drejtësisë 2021–2025 dhe Plani i saj i Veprimit;
- Strategjia Kombëtare për Mospërhapjen e Armëve të Dëmtimit në Masë dhe Plani i Veprimit për zbatimin e saj;
- Strategjia Ndërsektoriale e Menaxhimit të Integruar të Kufirit 2021-2027 dhe Plani i Veprimit 2021-2023;
- Strategjia Ndërsektoriale për Parandalimin e Ekstremizmit të Dhunshëm dhe Luftën kundër Terrorizmit 2023–2025 dhe të planeve të veprimit 2023–2025

Në këte Strategji trajtohen vetëm masa specifike për arritjen e qëllimit dhe prioritetëve të kësaj strategjie, duke i marre të mirëqena masat e përfshira në strategjitë e tjera ndërsektoriale.

### 5.1 Vizioni dhe misioni i Strategjisë:

Qëllimi kryesor i Strategjisë është *një ekonomi dinamike dhe sistem financiar i sigurve dhe me integritet që zhvillohen ndër të tjera edhe duke përmirësuar dhe modernizuar regjimin kundër PP/FT, duke garantuar sigurinë e shtetasve shqiptarë dhe duke respektuar të drejtat dhe liritë individuale.*


Kjo do të përforcojë përpjekjet e autoriteteve për të penguar kriminelët dhe kërcënimet e sigurisë kombëtare të aksesojnë në sistemin financiar të vendit dhe për t'i vendosur përpara përgjegjësisë për dëmin që shkaktojnë.



Për të arritur këtë qëllim (vizion) në funksion të përmirësimit dhe modernizimit të regjimit kundër PP/FT Strategjia ka identifikuar 4 prioritete (misioni):

- 1) Përmirësimi i politikbërjes dhe koordinimit.
- 2) Rritja e mëtejshme e efektivitetit operacional në parandalim.
- 3) Përmirësimi i efikasitetit operacional të organeve ligjzbatuese dhe agjencive të tjera të në luftën kundër PP/FT.
- 4) Përdorimi dhe shfrytëzimi i inovacioneve teknologjike duke zvogëluar rreziqet.

Të gjitha prioritetet ndërveprojnë dhe kanë pika të përbashkëta me njëra tjetrën dhe nuk duhen konsideruar si të shkëputura nga konteksti i përgjithshëm. Në vijim do të trajtohen të detajuar këto prioritete dhe masat mbështetëse për arritjen e tyre (objektivat specifik). Plani i veprimit i paraqitur në Aneksin 1 përshkruan se si do të zbatohen masat e caktuara (Produktet finale) dhe ofron informacionin e nevojshëm për veprimet e propozuara, afatet kohore, rolet dhe përgjegjësitë e të gjitha palëve të përfshira në masat e performancës, kërkesat e raportimit dhe monitorimit. Figura më poshtë jep një paraqitje skematike të organizimit të strategjisë.



## 5.2 Prioriteti nr.1: Përmirësimi i politikbërjes dhe koordinimit

Përmirësimi i politikbërjes dhe koordinimit ka si qëllim mbylljen e boshllëqeve ligjore dhe rregullative në sistemin kundër PP/FT duke synuar zvogëlimin e mundësive të shfrytëzimit nga aktorët e paligjshëm për të hyrë anonimisht në sistemin financiar të Shqipërisë. Kjo përfshin:

- Analizën e vazhdueshme të legjislacionit dhe përputhshmërinë e plotë me standartet ndërkombëtare dhe me Direktivat e BE.
- Rritja e efikasitetit të Grupit Teknik Ndërinstitucional i Punës
- Promovimin e praktikave të partneritetit publik-privat.
- Komunikim aktiv në publik i masave të marra dhe arritjeve në fushën e PP/FT.
- Rol aktiv i Shqipërisë në organizmat ndërkombëtare dhe rajonale të fushës së PP/FT.

## Prioriteti nr.1: Përmirësimi i politikbërjes dhe koordinimit

<b>1. Analiza e legjislacionit dhe përputhshmëria e plotë me standartet ndërkombëtare</b>	2. Rritja e efikasitet të Grupit Teknik Ndërinstitucional i Punës	3. Promovimi i praktikave të partneritetit publik-privat.	4. Komunikim aktiv në publik i masave të marra dhe arritjeve në fushën e PP/FT	5. Rol aktiv i Shqipërisë në organizmat ndërkombëtare dhe rajonale të fushës së PP/FT
---	---	---	--	---

Masat për arritjen e këtyre objektivave përfshijnë:

- Vlerësimin vjetor të përputhshmërisë ligjore të kuadrit PPP/FT nga GTN;
- Zgjerimi i numrit të institucioneve dhe subjekteve raportues që marrin pjesë në takimet e GTN;
- Rritja e frekuencës së takimeve të GTN;
- Krijimi i nën grupeve teknike për çështje të caktuara;
- Takime periodike midis përfaqësuesve të institucioneve ligjzbatuese dhe të inteligjencës, si dhe të përfaqësuesve të subjekteve kryesore raportuese;
- Zhvillimi i aktiviteteve publike në funksion të informimit, ndarjes së eksperiencave me sektorin privat dhe edukimit të publikut;
- Pjesëmarrje aktive dhe e gjerë në seancat e Moneyval/FATF, Grupit Egmont, grupet e punës dhe takimet rajonale, duke krijuar e zhvilluar një network-u të qëndrueshëm me këto organizma, si dhe duke synuar promovimin e zyrtarëve nga institucionet shqiptare në organet drejtuese të këtyre organizatave apo në grupet e punës.

### 5.3 Prioriteti nr.2: Rritja e mëtejshme e efektivitetit operacional në parandalim

Rritja e efektivitetit në shtyllën e parandalimit synon përmirësimin e mëtejshëm të sistemit parandalues në tërësi me qëllim rritjen e aftësisë zbuluese të sistemit. Nisur nga fakti që në vlerësimin e fundit nga Moneyval efektiviteti rezultoi me mangësi në disa dimensione, i është kushtuar rëndësi e veçantë duke synuar:

- Rritjen e fokusit në parandalimin e PP/FT nga disa kategori subjektsh me risk të lartë apo të mesëm, si dhe atyre që kanë mangësi në raportim RAD;
- Rritjen e RAD si dhe larmishmërisë së tipologjive të dërguara nga kategori subjektsh si p.sh kontabilist, auditues ligjor, ndërmjetës në shitblerje pasurish të paluajtshme, shoqëri ndërtimi etj;

- Konsolidimin e procesit të mbikëqyrjes mbi bazën e riskut PP/FT;
- Caktimi i burimeve njerëzore të përshtatshme në numër të dedikuara për mbikëqyrjen në disa kategori subjektsh sipas nivelit të rrezikut të identifikuar.
- Rritjen e ndërgjegjësimit për riskun e pastrimit të parave, financimit të terrorizmit dhe armëve të shkatërrimit në masë, tek subjektet raportuese dhe institucionet publike.

<b>Prioriteti nr.2: Rritja e mëtejshme e efektivitetit operacional në parandalim</b>				
<b>1. Rritja e fokusit në parandalimin e PP/FT nga disa kategori subjektsh</b>	2. Rritja e larmishmërisë së tipologjive të RAD	3. Konsolidimi i procesit të mbikëqyrjes mbi bazën e riskut PP/FT	4. Caktimi i burimeve njerëzore të përshtatshme në numër për mbikëqyrjen	5. Rritja e ndërgjegjësimit për riskun e PP/FT/ASHM

Masat për arritjen e objektivave të mësipërme janë:

- Identifikimi i nevojave për trajnim dhe hartimi i një plani trinimesh nga autoritetet mbikëqyrëse për kategoritë e subjekteve përkatëse që mbikëqyrin.
- Publikime dhe shpërndarje tipologjish (PP/FT/ASHM) midis organeve ligjzbatuese, inteligjencës, mbikëqyrësve dhe sektorit privat.
- Rishikim i strukturave nga autoritetet mbikëqyrëse duke caktuar burime njerëzore të përshtatshme në numër dhe cilësi në përputhje me riskun e subjekteve që mbikëqyrin.
- Rishikimi i vlerësimeve të risqeve nga mbikëqyrësit, sipas kategorive të subjekteve të ligjit, bazuar në gjetjet e vlerësimit kombëtar të riskut.

#### **5.4 Prioriteti nr.3: Përmirësimi i efikasitetit operacional të organeve ligjzbatuese dhe agjencive të tjera në luftën kundër PP/FT.**

Kjo kërkon përditësim të rregullt dhe komunikim të kërcënimeve dhe rreziqeve nga financimet e paligjshme, me autoritetet ligjzbatuese dhe vazhdimin e koordinimit ndërinstitucional kundër sfidave prioritare që lidhen me financimet e paligjshme, duke përmirësuar dhe zgjeruar përpjekjet për ndarjen e informacionit dhe përforcim në zbatimin e standardeve ndërkombëtare mbi PP/FT. Zbatimi i këtij prioriteti përfshin:

- Rritja e aksesit të organeve ligjzbatuese/inteligjencës dhe subjekteve të tjera të përcaktuara në ligj në regjistrat e disponueshëm në vendin tonë.
- Përmirësim të koordinimit dhe bashkëpunimit kombëtar për hetimin për veprën penale të pastrimit të parave dhe financimit të terrorizmit.
- Rritja e sekuestrimeve dhe veçanërisht konfiskimeve të aseteve kriminale;
- Zbatimin një sistemi efektiv të mbledhjes së të dhënave PP/FT nëpërmjet ngritjes së sistemeve efektive për mbajtje dhe analizim të dhënash statistikore për rastet e PP/FT.
- Rritja e efektivitetit të kontrollit në kufi për deklarimet e parasë fizike apo sendeve me vlerë.

**Prioriteti nr.3: Përmirësimi i efikasitetit operacional të organeve ligjzbatuese dhe agjencie të tjera në luftën kundër PP/FT**

<p><b>1. Rritja e aksesit në regjistrat e disponueshëm</b></p>	<p>2. Përmirësim i koordinimit dhe bashkëpunimit kombëtar për hetimin për veprën penale të PP/FT</p>	<p>3. Rritja e sekuestrimeve dhe veçanërisht konfiskimeve të aseteve kriminale</p>	<p>4. Zbatimi i një sistemi efektiv të mbledhjes së të dhënave statistikore për PP/FT</p>	<p>5. Rritja e efektivitetit të kontrollit në kufi për deklarime</p>
--	--	--	---	--

Këto objektiva do arrihen nëpërmjet këtyre masave:

- Identifikimi i sistemeve/regjistrave të nevojshëm për tu përdorur në parandalimin dhe luftën ndaj PP/FT
- Analizë nga çdo institucion i nevojave për akses në përputhje me funksionet e tyre.
- Vendimi dhe dhënia e aksesit sipas nevojave.
- Vlerësimi i burimeve njerëzore në dispozicion për investigim të PP/FT
- Takime periodike dhe ndarje tipologjish për PP/FT midis Prokurorive, Inteligjencës dhe Policisë së Shtetit.
- Miratimi i projektligjit dhe nisja e punës së Zyrës së Rikuperimit të Aseteve.
- Analizimi i sistemeve ekzistuese të statistikave, me qëllim vlerësimin e nevojave për përmirësim.
- Caktimi i pikave të kontaktit nga secili autoritetet kompetent për mbledhjen, ruajtjen dhe shpërndarjen e të dhënave përkatëse statistikore.
- Përmirësim të metodës në mbledhjen, ruajtjen dhe shpërndarjen e të dhënave statistikore nga policia e shtetit për rastet e PP/FT, në mënyrë që ky autoritet të kuptoj më mirë risqet.

- Përmirësim të metodës në mbledhjen, ruajtjen dhe shpërndarjen e të dhënave statistikore nga Prokuroria për rastet e PP, në mënyrë që t'i shërbejnë më mirë analizave, përfshirë analizave, përfshirë analizës së risqeve.
- Rivlerësimi i metodologjisë/procedurave/manualeve të lidhura me mënyrën e përcaktimit dhe ushtrimit të kontrolleve në kufi, përsa i përket deklarimit apo mosdeklarimit të parasë fizike apo metaleve dhe gurëve të çmuar.
- Përgatitja dhe shpërndarja e indikatorëve për evidentimin e rasteve të dyshimta të lidhura me mosdeklarimet në kufi dhe shpërndarjen në çdo PKK.

#### **5.5 Prioriteti nr.4: Përdorimi dhe shfrytëzimi i inovacioneve teknologjike duke zvogëluar rreziqet.**

Shqipëria është në një pikë kthese të rëndësishme ekonomike dhe shoqërore për shkak të një sërë sfidash transformuese të udhëhequra nga tranzicioni digjital. Teknologjitë digjitale po bëhen më thelbësore në jetën e përditshme. Shqipëria do të shfrytëzojë fuqinë e digjitalit për të trajtuar sfidat e mëdha me të cilat përballemi në vitet e ardhshme. Synimi strategjik është të jemi një lider digjital në rajonin e Ballkanit Perëndimor dhe në harmoni me prirjet digjitale globale duke promovuar agjendën digjitale në mënyrë efektive dhe koherente në të gjitha fushat e politikave të qeverisë dhe ofrimit të shërbimeve, duke punuar ngushtë me të gjithë aktorët pjesëmarrës në zhvillimin e vendit.

Qeveria e Shqipërisë do të ofrojë mbështetje rregullative dhe politike për sigurinë e identitetit digjital dhe për teknologjitë inovative në përputhshmëri me standardet kundër PP/FT dhe do të vazhdojë të përmirësojë përdorimin e inteligjencës artificiale (IA) dhe analizave të të dhënave në përpjekjet e qeverisë së për të zbuluar dhe goditur financimet e paligjshme. Sa më sipër, në fushën e PP/FT synohet të arrihet nëpërmjet:

- Ngritjes dhe konsolidimit të sistemeve digjitale të menaxhimit dhe gjurmimit të çështjeve;
- Përdorimi i teknologjisë për rritjen e përputhshmërisë të subjekteve me rregullat kundër PP/FT
- Përdorimit të IA në analizimin e të dhënave në luftën ndaj PP/FT
- Vlerësimin dinamik të riskut lidhur me PP/FT nga përdorimi i mjeteve virtuale dhe teknologjive të reja.

**Prioriteti nr.4: Përdorimi dhe shfrytëzimi i inovacioneve teknologjike duke zvogëluar rreziqet**

<p><b>1. Ngritja dhe konsolidimi i sistemeve digjitale të menaxhimit dhe gjurmimit të çështjeve</b></p>	<p>2. Përdorimi i teknologjisë për rritjen e përputhshmërisë të subjekteve me rregullat kundër PP/FT</p>	<p>3. Përdorimi i IA në analizimin e të dhënave në luftën ndaj PP/FT</p>	<p>4. Vlerësimi dinamik i riskut lidhur me PP/FT nga përdorimi i mjeteve virtuale dhe teknologjive të reja</p>
---	--	--	--

Masat për arritjen e këtyre objektivave janë si në vijim:

- Vlerësim i nevojave për investime ne teknologji nga çdo institucion në funksion të përmbushjes së detyrimeve ligjore dhe rritjes se eficencës dhe rezultateve.
- Plan investimesh në bazë te vlerësimit të nevojave dhe përfshirja në PBA
- Krijimi i sistemeve të automatizuar për menaxhimin dhe gjurmimin (Case Management) e rasteve në Prokurorinë e Përgjithshme (duke mbuluar të gjitha Prokuroritë e Juridiksionti të Përgjishthëm) si dhe SPAK, duke mundësuar kështu përç nxjerrjes së statistikave, edhe gjurmimin e çështjeve dhe rritje e mekanizmave koordinues;
- Koordinim mes organeve (të mbikëqyrjes, inteligjencës, hetimit) me qëllim rritjen e bashkëpunimit, verifikimeve, kontrolleve në fushën e VASP.
- Analiza sektoriale nga çdo institucion mbikqyrës, duke analizuar trendet, risqet dhe përfitimet bazuar në zhvillimet teknologjike të fushës së mbikëqyrjes.
- Rritja e ndërgjegjësimit dhe kapaciteteve profesionale nëpërmjet trajnimeve, shpërndarje tipologjish, të autoriteteve publike, lidhur me tipologji të PP/FT përmes mjeteve virtuale si dhe kapaciteteve teknologjike.

## **VI. MONITORIMI DHE VLERËSIMI**

Organet e ngarkuara parashikohet të raportojnë në AIF çdo 4 muaj për masat e marra në përputhje me planin e veprimit të kësaj strategjie. AIF shërben si sekretariat i Grupi Teknik Ndërinstitucional i Punës, i cili ka në përbërje përfaqësues të gjitha institucioneve anëtare të Komitetit të Bashkërendimit të Luftës Kundër Pastrimit të Parave. Raportimi në AIF do të realizohet përmes anëtarëve të Grupit Teknik Ndërinstitucional i Punës. Grupi Teknik Ndërinstitucional i Punës parashikohet të mblidhet të paktën 3 herë në vit. AIF realizon përmbledhje të progresit të arritur dhe problematikave, si dhe raporton 2 herë në vit pranë KBLKPP.

Me iniciativën e secilit anëtar të KBLKPP, plani i veprimit mund të ndryshohet periodikisht, në vartësi të dinamikave, nevojave apo rrezeve të reja që lindin gjatë periudhës së zbatimit.

Ky dokument do shpërndahe në versionin final të gjithë aktorëve kryesorë të përfshirë në këtë proces dhe gjithashtu një version i përmbledhur do të përpunohet me qëllim vendosjen në platformën e AIF për tu aksesuar nga subjektet raportuese.

## ANEKS 1: TABELA E PLANIT TË VEPRIMIT

PRIORITETI NR. 1: Përmirësimi i politikbërjes dhe koordinimit												
<p><b>OBJEKTIVI SPECIFIK 1.1 - Analiza e vazhdueshme të legjislacionit dhe përputhshmëria e plotë me standartet ndërkombëtare dhe me Direktivat e BE.</b>  <b>OBJEKTIVI SPECIFIK 1.2 - Rritja e efikasitet të Grupit Teknik Ndërinstitucional TË Punës</b>  <b>OBJEKTIVI SPECIFIK 1.3 - Promovimin e praktikave të partneritetit publik-privat</b>  <b>OBJEKTIVI SPECIFIK 1.4 - Komunikim aktiv në publik i masave të marra dhe arritjeve në fushën e PP/FT</b>  <b>OBJEKTIVI SPECIFIK 1.5 - Rol aktiv i Shqipërisë në organizmat ndërkombëtare dhe rajonale të fushës së PP/FT</b></p>												
Nr.	Veprimtari	Strukturat përgjegjëse		Afati i fillimit	Afati i mbarimit	Treguesit	Baseline	Synimet/Targets				Buxheti
		Institucioni përgjegjës	Institucioni kontribues				Viti 2024	Viti 2025	Viti 2026	Viti 2027		
1.1.1	Vlerësimi vjetor i përputhshmërisë ligjore të kuadrit PPP/FT.	GTN		2024	2027	Dokument vjetor i GTN me analizën dhe propozimet për ndryshime ligjore	1	1	1	1		
1.2.1	Zgjerimi i numrit të institucioneve dhe subjekteve raportues që marrin pjesë në takimet e GTN.	KBLKPP	GTN, DPT, DPD, QKB, BMP, ASHK, AMLF, DHKA, SHB, NAREA, DHKN, AFEA, Shoqata e ndërtuesve	2024	2027	Vendim nga KBLPP I zgjerimit të pjesëmarrjes në takimet e GTN	1					
1.2.2	Rritja e frekuencës së takimeve të GTN	KBLKPP	GTN	2024	2027	Nr i takimeve vjetore të GTN I shoqëruar me raportin e minutave dhe vendimmarrjen	4	4	4	4		
1.1.3	Krijimi i nën grupeve teknike për çështje të caktuara	KBLKPP	GTN	2024	2027	Vlerësim periodik për nevojën nga GTN						



1.3.1	Takime periodike midis përfaqësuesve të institucioneve ligjzbatuese dhe të inteligjencës, si dhe të përfaqësuesve të subjekteve kryesore raportuese.	AIF, AMF, BSH, DPSH, PP	Subjektet raportuese kryesore sipas fushës së mbikqyrjes	2024	2027	Numri i takimeve të shoqëruara me info për temat e diskutimeve	2	3	2	2	
1.1.5	Zhvillimi i aktiviteteve publike në funksion të informimit, ndarjes së eksperiencave me sektorin privat dhe edukimit të publikut.	GTN	Të gjitha institucionet e përfshira në GTN	2024	2027	Nr. i aktiviteteve/takimeve tematike vjetore	Per tu caktuar				
1.1.6	Pjesëmarrje aktive dhe e gjerë në seancat e Moneyval/FATF, Grupit Egmont, grupet e punës dhe takimet rajonale, duke krijuar e zhvilluar një network-u të qëndrueshëm me këto organizma, si dhe duke synuar promovimin e zyrtarëve nga institucionet shqiptare në organet drejtuese të këtyre organizatave apo në grupet e punës.	GTN	Të gjitha institucionet e përfshira në GTN	2024	2027	Raport në KBLKPP	1	1	1	1	

## QËLLIMI I POLITIKËS II. RRIJJA E MËTEJSHME E EFEKTIVITETIT OPERACIONAL NË PARANDALIM

**OBJEKTIVI SPECIFIK 2.1 - Rritja e fokusit në parandalimin e PP/FT nga nga kategori subjektsh në fushën e kontabilitetet siç janë audituesit, kontabilistët por edhe agjentët e pasurive të paluajtshme**  
**OBJEKTIVI SPECIFIK 2.2 - Rritja e larmshmërisë së tipologjive të RAD të dërguara nga kategori subjektsh si p.sh nga tregtimi i mjeteve motorike, ZKV, Shoqëritë e ndërtimit**  
**OBJEKTIVI SPECIFIK 2.3 - Konsolidimi i procesit të mbikëqyrjes mbi bazën e riskut PP/FT**  
**OBJEKTIVI SPECIFIK 2.4 - Caktimi i burimeve njerëzore të përshtatshme në numër të dedikuara për mbikëqyrjen në disa kategori subjektsh sipas nivelit të rrezikut të identifikuar.**  
**OBJEKTIVI SPECIFIK 2.5- Rritja e ndërgjegjësimit për riskun e PP/FT/ASHM, tek subjektet raportuese dhe institucionet publike**

Nr.	Veprimtari	Strukturat përgjegjëse		Afati i fillimit	Afati i mbarimit	Treguesit	Baseline	Synimet/Targets				Buxheti
		Institucioni përgjegjës	Institucioni kontribues				Viti 2024	Viti 2025	Viti 2026	Viti 2027		
2.1.1	Identifikimi i nevojave për trainim dhe hartimi i një plani trainimesh nga autoritetet mbikqyrëse për kategoritë e subjekteve përkatëse që mbikqyrin.	GTN	AIF, AMF, BSH, BMP, AMLF, MD,	2024	2027	Numri i trajnimeve vjetore të zhvilluara me subjektet raportuese						
2.2.1	Publikime dhe shpërndarje tipologjish (PP/FT/ASHM) midis organeve ligjzbatuese, inteligjencës, mbikqyrësve dhe sektorin privat.	GTN	AIF, PP, SPAK, PSH, BKH, AMF, BSH, BMP, AMLF, MD	2024	2027	Numër publikimesh dhe tematikat përkatëse						
2.3.1	Përditësim i manualeve për mbikëqyrjen bazuar në risk	GTN	AIF, AMF, BSH, BMP, AMLF, MD	2024	2027	Nr i manualeve të përditësuar						

2.3.2	Trajnimet e punonjësve për mbikëqyrje të rasteve/çështjeve me bazë risku për PP/FT.	GTN	AIF, AMF, AMLF, BMP, BSH, MD	2024	2027	Numër trajnimesh të zhvilluara për stafin						
2.3.3	Vlerësimi i praktikave më të mira ndërkombëtare për fushën e mbikëqyrjes dhe përfshirjen e tyre në procesin e inspektimeve në vend dhe në distancë	GTN	AIF, AMF, AMLF, BMP, BSH, MD	2024	2027	Numri i rasteve të ndara me subjektet gjatë inspektimeve						
2.4.1	Rishikim i strukturave nga autoritetet mbikëqyrëse duke caktuar burime njerëzore të përshtatshme në numër dhe cilësi në përputhje me riskun e subjekteve që mbikëqyrin.	GTN	AMF, BSH, BMP, AMLF, MD	2024	2027	Raport mbi ndryshimet strukturore						
2.5.1	Rishikimi i vlerësimeve të risqeve nga mbikëqyrësit, sipas kategorive të subjekteve të ligjit, bazuar në gjetjet e vlerësimit kombëtar të riskut	GTN	AMF, BSH, BMP, AMLF, MD	2024	2027	Dokument mbi vlerësimin e riskut bazuar edhe në NRA						
<b>QËLLIMI I POLITIKËS III. PËRMIRËSIMI I EFIKASITETIT OPERACIONAL TË ORGANEVE LIGJZBATUESE DHE AGJENCIVE TË TJERA NË LUFTËN KUNDËR PP/FT</b>												
<b>OBJEKTIVI SPECIFIK 3.1 - Rritja e aksesit të organeve ligjzbatuese/inteligjencës dhe subjekteve të tjera të përcaktuara në ligj në regjistrat e disponueshëm në vendin tonë.</b>												
<b>OBJEKTIVI SPECIFIK 3.2 - Përmirësim të koordinimit dhe bashkëpunimit kombëtar për hetimin për veprën penale të pastrimit të parave dhe financimit të terrorizmit.</b>												
<b>OBJEKTIVI SPECIFIK 3.3 - Rritja e numrit të konfiskimeve të aseteve kriminale;</b>												
<b>OBJEKTIVI SPECIFIK 3.4 - Zbatimin një sistemi efektiv të mbledhjes së të dhënave PP/FT për mbajtje dhe analizim të dhënash statistikore për rastet e PP/FT.</b>												
<b>OBJEKTIVI SPECIFIK 3.5 - Rritja e efektivitetit të kontrollit në kufi për deklarimet.</b>												
Nr.	Veprimtari dhe nënveprimtari	Strukturat përgjegjëse		Afati i fillimit	Afati i mbarimit	Treguesit	Baseline	Synimet/ Targets				Buxheti
		Institucioni përgjegjës	Institucioni Kontribues				Viti 2024	Viti 2025	Viti 2026	Viti 2027		
3.1.1	Identifikimi i sistemeve/regjistrave të nevojshëm për tu përdorur në parandalimin dhe luftën ndaj PP/FT	GTN	AIF, DPSH,PP, SPAK,BKH,, AIF, AMF, BSH, BMP, AMLF, MD	2024	2027							
3.1.2	Analizë nga cdo institucion i nevojave për akses në përputhje me funksionet e tyre	Të gjitha institucionet e përfshira		2024	2027							
3.1.3	Vendimi dhe dhënia e aksesit sipas nevojave	KBLKPP	GTN	2024	2027							
3.2.1	Vlerësimi i burimeve njerëzore në dispozicion për investigim të PP/FT	Të gjitha institucionet e përfshira		2024	2027							
3.2.2	Takime periodike dhe ndarje tipologjishë për PP/FT midis Prokurorive, Inteligjencës dhe Policisë së Shtetit.	AIF	PP DPSH	2024	2027							
3.2.3	Miratimi i projektligjit dhe nisja e punës së Zyrës së Rikuperimit të Aseteve	MB	DPSH	2024	2027							

3.4.1	Analizimi i sistemeve ekzistuese të statistikave, me qëllim vlerësimin e nevojave për përmirësim.	GTN	AIF,PP,SPAK, DPSH.BKH	2024	2027						
3.4.2	Caktimi i pikave të kontaktit nga secili autoritetet kompetent për mbledhjen, ruajtjen dhe shpërndarjen e të dhënave përkatëse statistikore.	GTN	PP, DPSH, AIF, SPAK, BKH	2024	2027						
3.4.3	Përmirësim të metodës në mbledhjen, ruajtjen dhe shpërndarjen e të dhënave statistikore nga policia e shtetit për rastet e PP/FT, në mënyrë që ky autoritet të kuptoj më mirë risqet.	DPSH		2024	2027						
3.4.4	Përmirësim të metodës në mbledhjen, ruajtjen dhe shpërndarjen e të dhënave statistikore nga Prokuroria për rastet e PP, në mënyrë që ti shërbejë më mire analizave, përfshirë analizës së risqeve.	PP		2024	2027						
3.5.1	Rivlerësimi i metodologjisë/procedurave/manualeve të lidhura me mënyrën e përcaktimit dhe ushtrimit të kontrolleve në kufi, përsa i përket deklaratimit apo mosdeklarimit të parasë fizike apo metaleve dhe gurëve të çmuar.	DPD		2024	2027						
3.5.2	Përgatitja dhe shpërndarja e indikatorëve për evidentimin e rasteve të dyshimta të lidhura me mosdeklarimet në kufi dhe shpërndarjen në çdo PKK	DPD	DPPSH (Kufiri & Emigracionit)	2024	2027						
<b>QËLLIMI I POLITIKËS 4: PËRDORIMI DHE SHFRYTËZIMI I INOVACIONEVE TEKNOLOGJIKE DUKE ZVOGËLUAR RREZIQET</b>											
<b>OBJEKTIVI SPECIFIK 4.1 - Ngritja dhe konsolidimi të sistemeve digjitale të menaxhimit dhe gjurmimit të çështjeve;</b>											
<b>OBJEKTIVI SPECIFIK 4.2 - Përdorimi i teknologjisë për rritjen e përputhshmërisë të subjekteve me rregullat kundër PP/FT</b>											
<b>OBJEKTIVI SPECIFIK 4.3 - Përdorimit të IA në analizimin e të dhënave në luftën ndaj PP/FT</b>											
<b>OBJEKTIVI SPECIFIK 4.4 - Vlerësimin dinamik i riskut lidhur me PP/FT nga përdorimi i mjeteve virtuale dhe teknologjive të reja.</b>											
Nr.	Veprimtari dhe nënveprimtari	Strukturat përgjegjëse		Afati i fillimit	Afati i mbarimit	Treguesit	Baseline	Synimet/ Targets			Buxheti
		Institucioni përgjegjëse	Institucioni kontribues				Viti 2024	Viti 2025	Viti 2026	Viti 2027	
4.1.1	Vlerësim i nevojave për investime ne tekonologji nga çdo institucion në funksion të përmbushjes së detyrimeve ligjore dhe rritjes se efencës dhe rezultateve.	GTN	TË GJITHA INSTITUCION ET PJESË E GTN	2024	2027	Raport i GTN për KBLKPP dhe vendimmarrja për miratim sipas prioriteteve	1	1	1	1	
4.2.1											
4.3.1											
4.1.2	Plan investimesh në bazë te vlerësimin të nevojave dhe përfshirja në PBA	GTN	TË GJITHA INSTITUCION ET PJESË E GTN	2024	2027	Raport i GTN për KBLKPP për vitin 2014 dhe vlera e investimeve të alokuara për vitet në vijim	1				
4.2.2											
4.3.2											

4.1.3	Krijimi i sistemeve të automatizuar për menaxhimin dhe gjurmimin (Case Management) e rasteve në Prokuroritë e Juridiksionit të Përgjithshëm dhe SPAK	PP SPAK		2024	2025	Sistemi i gatshëm për përdorim	Nisja e punës	Sistemi funksional	-	-	
4.4.1	Koordinim mes organeve (të mbikëqyrjes, inteligjencës, hetimit) me qëllim rritjen e bashkëpunimit, verifikimeve, kontrolleve në fushën e VASP.	AMF	AIF, DPSH	2024	2026	Analizë dhe plan veprimi për kryerjen e verifikimeve	Dokumenti i analizës i përfunduar	Raport për përverifikasi met dhe rastet e identifi kuara	Raport për përverifikasi met dhe rastet e identifi kuara	-	
4.4.2	Analiza sektoriale nga cdo institucion mbikqyrës, duke analizuar trendët, risqet dhe përfitimet bazuar në zhvillimet teknologjike të fushës së mbikëqyrjes.	GTN	AIF, BSH, AMF, MD, BMP, DPT	2024	2025	Raport përmbledhës nga GTN për vlerësimet e çdo institucioni		Raporti i paraqitur në KBLK PP			
4.4.3	Rritja e ndërgjegjësimit dhe kapaciteteve profesionale nëpërmjet trajnimeve, shpërndarje tipologjish, të autoriteteve publike, lidhur me tipologji të PP/FT përmes mjeteve virtuale si dhe kapaciteteve teknologjike.	AMF	AIF, DPSH, PP, SPAK, DPT, DPD, BMP, BSH, ILDKPKI	2024	2027	Trajnime të zhvilluara Persona të trajnuar Tipologji të shpërndara					